

元張文忠公歸田類藁卷十五

歷城 張養浩希孟氏 撰

同邑後學

周永年書

校刊

七言古詩

題周氏池亭

東風吹樹飄紅雪碧雲冉冉迷林樾入門高掛四面窗
水光山色尤奇絕恍疑造物同我遊參差夢裡金銀闕
眼中不見無極翁閒殺濂溪舊風月

待鳳石 并序

魚日類
卷三
余近得奇石一田兵部師孟同臺掾杜李先過
而觀之遂名曰待鳳以其一峯橫出若待物來
棲者因而名之余嘉其詞雅而意深故爲之賦
岐山鳳去天爲老闍殺蒼梧與瑤草空餘陳迹十丈臺
只辨烟霞靚凡鳥朝陽一鳴三千年天地此心何日了
幾回夜月琴罷彈彷彿玉音來縹緲雲間九苞望不見
几上一峯空自好青天倘與達寸誠白日終當見孤矯
古來奇士志頗同抱玉樊邱不爲少子陵坐釣桐江春
正則行吟楚澤曉白石甯戚半夜歌太華希夷五雲遶

兵曹命名寓世箴迂叟有詩成腹藁斯名但恐還徒然
喜極二豪俱悄悄簾影風微篆煙裊

五
同潘獻臣元復初張子昭高巖寺賞白蓮

雨過琳宮失殘暑行枝翠濕低蔬圃入門倍覺老眼明
寒碧一盆花四五不勞掛席雲水鄉坐覺西湖在眉宇
蒲搖風影劍無庭荷瀉露華珠返浦龜魚江海均意適
蘊藻王公亦心許何年仙子謫帝居驚到維摩散花女
三生夢斷金沙灘未必香魂遽塵土同來數子俱好事
爭擲青鳧醉鸚鵡坐中老衲計更奇暗伏毛錐不時舉

忽聞題詠須卽席衆氣勃然齊一鼓或昂或俯或吻鳴
或蹙或擻或目語或先磨墨務速成或已終篇耻輕吐
須臾能事俱告畢白壁明珠爛盈廡論功行賞四座謹
我不能然觴甘楚蘇從今風雅會當日然一作轉首秋容泣
寒雨

五
萬年松 并引

萬年松生五臺山中長三寸許好事者采置諸
囊或夾於書簡不許歲時幾何出而水之則生
意輒復以故土人謂爲萬年松日者田兵部師

孟以數本見貽且曰當作古風一章惠我願爲
篋笥之光乃爲之賦

君不見崑崙有柏干似強青天雷雨蛟龍翔人間斤斧
日相踵奇材政恐終自戕又不見檟櫟擁腫無何鄉匠
石望知非棟樑孰令枝榦隘寥廓萬古齒冷南華莊豈
知此樹生寸許不爲刑形累恒蒼蒼貞心勁氣恥止著雖
遭縛束仍芬芳微根纏糾亂石髮細葉茸密攢鍼芒呼
童汲井滌烟翠老眼但見叅天長傳聞產自金色界貝
典不載不可詳天花羞落居士室祇樹傾倒梅檀場吾

家秀碧雅相稱峯巒戲縮雲微茫一從植此向幽寂劍
戟森然光射堂天公豈以我為戲故遣二物陪徜徉穹
林崇岳漫霄漢而我亦笑造物狂古今何事非幻景榮
枯美惡均亡羊作詩寄謝子方子何時更為齊東野叟
分滄浪

秀碧石

有客自和林廻惠怪石拳許峯巒隱然色明潤
可愛因名曰秀碧遂作是詩以荅之

有客至自元宴國袖攜一峯元氣濕知我雅有山林思

和雲持贈曾莫惜嶙峋玉立三寸強意氣巋然壓秋色
初疑女媧醉墮簪劫火不燒千萬億又疑鼎湖遺寶劍
水齧惟餘半尖碧苔痕剝盡出本真頓覺嵐光異曠昔
虛堂晝永爐烟微目擊道存真莫逆若令解語儘可師
政使不高何損德聖門顏子具體微齊國晏嬰才六尺
物形果有大小殊達觀元無高下隔褰裳欲陟還踟躕
一笑詩成山鬼泣

天屏歌 并序

延祐四年予以公糴適中都傳過懷安山中得

石如板者二文理類林薄根枝柯葉毫分縷析
 高下鬱然微有丹點朱痕隱見其上遂名其一
 曰林梢遺照一曰木未餘霞總而名之曰天屏
 視彼區區人力為者蓋相萬矣嗚呼豈化工之
 筆山靈不敢私秘因假余以示世耶故志其狀
 而系之以歌其歌曰

懷安山高去天尺巖壑尋常烟霧黑豐隆力盡挾不開
 中有神君寫秋色老寬走避營邱潛關同愁絕郭熙泣
 物生應亦憤太專故奪英華發之筆塗雲為葉虹為柯

所記雖殊生意一高者如巨人傲鬼不可即一作低者

如始孩頭角已岐嶷繁如秦擁百萬兵疎似周釐十二

國何年龍虎遺大還數點和烟厭空色嘗許真宰元無

心以此擁窮知未必無乃羣木陰射透三生石老蚌曾

食明月光火鏡能禡太陽魄莫靈兩曜彼尚侵野外蒼

枯復誰不惜那得面目真自本一稍而無或怪禽欲

止還周章獰獸驚看為辟易天生神物豈偶然出示終

當須有識我來適值春色闌紅雨滿空塵不濕綠道方

謳吟披荒見奇蹟笑攜元氣歸袖裏東海窄呼童汲沆

元李歷

溘老手自摩挲黃雲卷盡桂露丹夕日欲沉霞散赤麗
 水休汰金荆山莫搜壁政爾苦索居邂逅得莫逆明窓
 撫玩清畫閉却願龍沙永為客緬思窮壤間二氣互消
 息萬象從發生不作宋楮刻如何此段奇直欲毫髮析
 無聲詩句誰可續照座白石影搖壁雲毋祇足俗眼遮
 錦帳何曾奇禍隔梅花捲月坐卧具未許閒愁闖吾室
 第恐夜半六丁排闥入

五

三

餘歡堂為許仲文作

燕山元氣橫秋高下有逸士思鳴臯沉冥一世湖海豪

掉頭不與王公交九鼎腥沸庖鼓刀何如時薦溪澗毛
 紅樓夜月龍鳳簫歡聲輸與康衢謠食魚豈必橫海鰲
 娶妻安用傾城妖鄧林喧鳥止一巢蝸角幾許戈矛操
 平生此意湯雪消人知不知自囂囂有田負郭惟釀醪
 有子教義期無驕赴人急難若已遭奉親不使親知勞
 長安喬木風雪號一庭蘭玉祥雲飄古來大隱多市朝
 烟雲徒起終南嘲召南董生稱自譙洛中康節誰能招
 清風未覺千載遙書堂台賜餘懽袞蹇余漫為軒冕膠
 辱齊山岳榮纖毫日中奔走影詎逃何時並駕塵寰超

詩成撫卷心怱怱

五十四

題李太白登泰山觀日出圖

岱宗鬱鬱天下雄
謫仙落落人中龍
茲山茲人乃相從
氣奪真宰愁豐隆
玉堂一任雲霧封
長嘯飛度秦皇松
夜呼日出滄海東
再爲斯世開鴻濛
鈞天帝居深九重
醉舞踏碎青芙蓉
天孫玉女爲斂容
却視五岳秋塵同
長鯨一去不復逢
乾坤爲黑虜
秋蟲當年咳唾留絕峯
至今樹石生香風
我欲追之杳無蹤
不意邂逅會此中
屋梁落月依然空

五

謝益都宣靖王賜酒

往年帝爲民食艱
麴生遠謫瓊崖山
渴欲江湖入吞吐
吁嗟無路無從攀
矧予幽獨久林壑
風月齷齪烟霞慳
茲辰復何辰
伴來自雲間
田夫走報釋鋤耨
樵者起視遺荆菅
老夫聞言數郊望
喜氣干丈虹霓彎
汲泉躬洒苔蘚徑
設榻旋啟松雲關
蠹編整頓匣綠綺
鶴擎抖擻巾白綸
肅容導入方丈室
雙瓶古錦封爛熳
使云賢王鎮東土
知汝勇退辭朝班
惟名惟利世羈鞅
自非真悟孰能刪
公車屢走不一赴
冥然物外甘伏跽
擬崇退讓

厲趨競我酒我飲今汝頌無功冒受恐非福令人發媿
顏爲殷金莖玉露天上春竒香驚倒茵與蘭投筇伏地
再三拜感激一作始欲涕泗潛平生自忖非俊才鈍如
鴛乘拙若鴛有巢拳許不能葺架虹敢效公輸般強爲
血指不知免所以袖手避謗訕而人誤此作高尚適足
於我爲恫瘝譬如嬰孺本好弄孰知不戲由癡癩伊誰
持此誑清聽徒使軒蓋臨溪灣西村傳聞誠翁媪東崦
來覩扶惇鰥林花動色汀草舞園鳥亦爲鳴啾啾一酌
破枯寂再酌伸皺僂三酌蛻塵世詎止方寸悠然憫白

日爲我永太古爲我還何當大稔遍賜醕坐使六合皆
懽顏鄒枚文雅謝無有但能飲啜寧非頑開筵幸許廁
諸叟侑席不必歌雙鬟地屏岫回互雲幙天圍園山中
聞至音漱玉溪潺潺只此一朝樂可當千載開淋漓青
霞裾錯落明月環氣復少時盛形改中年孱望望蓬來
宮縹緲仙所寰長肅恣游歷百怪誇神姦阿羅現十身
獨俗呈全班堅吾尾幽頰奢此蹤羣蠻大鵬搏扶搖膽
落鸚鵡鸞倒海騰天吳魂褫犀兕豻鯨不足而翼魚不
鱗而彩樓臺構半空隱隱如城闌抵掌陽候癡怒目空

爾取不解藏至寶珠琲落樹聲珊珊異光天燭龍天矯
翁忽變化不可扳湘妃鼓瑟侍姑射姿態不類凡姬嫺
下方半世惡緣重夙愆從此或少緩須臾松風作怒忽
吹覺但見綽然亭下烟波萬頃飛白鷗

詠亭中杏花效韓文公體

曩余京宦恒寡悰程書惟懼日不供春行偶與桃李面
星火未始能從容居嘗發憤心與口若歸永與花相從
自酬夙願返田圃幾年種杏尋無蹤或及尺寸鶴見啄
或甫萌芽藥雞交攻東君無乃亦薄惡不使生意閭門鍾

邇來移植惟兩株自藩自樹水土封心虞傍樹奪厥秀
割愛爲枿窻前松殷勤發視曾幾時一旦英發喧羣蜂
大枝矯如奮小枝偻如恭枯不入焦槁麗不淪纖穠晨
陰慘慘恨何積午霽澌澌色欲鎔風香一榻春漠漠月
影滿地波溶溶爛遊雖未曲江比諦玩已勝京華逢度
高僅出墻數尺數芳奚翅花千重行窺坐對有餘喜朝
吟夕詠不復慵平生愛玉欲成癖邂逅獲此琥與琮有
時幽鳥鳴其間洋洋盈耳笙竽鏞鳴君顛覆爲瓊蕊楚
客憔悴爲芙蓉明皇不悟海棠禍梨穆竟坐芳蘭凶世

俗共重姚魏花推爲萬紫千紅宗孰知於世略無益不
實而艷徒丰茸吾聞甚美必甚惡政使斗許將安庸滔
滔泥色古今一奔賞謾使人憧憧彼居塵土已爲失況
當池館繁華衝且如此樹人境外孤高無異楚雨龔獨
超衆好識者誰雲莊老人鬢鬢鬆逸情搖蕩山水窟新
詩軒豁風雲習遮寒不用錦步障取醉自有玻璃鍾山
中交友殘客無雜漁雜牧雜樵農相過邂逅爲絕倒或
遣巾幘或投筇天公豈悔前日慳著意重染迺爾濃却
愁風雨妬春色儻欲訪古學參龍平生富貴土苴視爲
花如此還憐儂停毫不覺笑良久野烟落日昏高墉

五
書大唐中興頌後

維君南面非自娛將使率土皆寧居一人縱欲萬夫病
不惟亡國兼亡軀三郎初年亦英銳講武風動驪山墟
姚崇力用破羣議喜猷善政不一書台衡繼以宋廣平
貞心烈日秋霜俱自從政柄歸偃月鴉爲鸞鳳麟爲猪
幽陵乘隙弄王室愛之如子矧肯誅養成跋扈悔無濟
六蜚失馭蒙塵趨忠王但可盡子職因危被袵徒嗟吁
幸然天未斡神鼎盜手奪出驪龍珠唐家累世罹女禍

一車纜覆又一車奈何目擊昧殷鑒乾陽甘為羣陰驅
乃知君德貴剛健不爾何以令八區於戲後來其鑒諸
於戲後來其鑒諸

五

石鼓詩 時在南城文廟

粵自鴻蒙剖元秘天祚有熊炎帝繼候剛覃思神與凝
摹寫三千入書契蒼姬一變史籀出鯨搜鰲吐鳳鸞振
羸秦自帝不古師遂使姦斯愚叔世當時玉筋天下獨
爾後爭奇古文棄末流諸子相祖述刊樸遺淳趁姿媚
我嘗慨此愧疎淺一髮空危萬鈞係竭來庠宇覩石鼓

玉立儼然三代器細思伊始將安庸或謂宣王章獵事
且疑且信邈難詰日月羣陰欲食既或為雷電下取將
僅餘二百七十二貞堅不墮劫火灰蒼古猶含太初氣
世間鍾鼎瓦礫如隻辭千金未為貴昌黎作歌恨才薄
坡老來觀惜時異區區流轉又幾朝終不能忘見天意
若令好事堪把玩攘竊恐應窮萬計平生漫有博物名
追視不能詳一字沉吟獨立西風前喬木荒烟日西墜

五

毛良卿送牡丹 并序

同開毛良卿家牡丹盛開意余一過而未敢顯

言日者以折枝數花見貺余愧老嬾不敢副其
意故作是詩以釋之

三年野處雲水俱逢春未始襟顏舒故人持贈木芍藥
慰我意重明月珠入門神采射人倒荒村爭看傾城妹
急呼瓶水浴紅翠明窻淨几相依於自言私第惟此本
每開蹶轂窮朝脯樹高丈許花數十紫雲滿院春扶疎
栽培直訝天上種熏染不類人間株有時風蕩香四出
舉國皆若蘭爲裾貧家蔀屋僅數椽照耀無異華堂居
天葩如此忍輕負轉首夢斷巫山孤明當灑掃遲鳧舄
未審肯踵荒寒無余聞感德良勤劬久習懶散倦世途
深藏非是德公傲索居莫哂儀曹愚禁厨一齷味已得
類推固可知其餘君持詩去爲花誦蜂蝶應亦相懽娛

五
遊香山

按日下舊聞載此詩僅十二句

山行彌日山益奇亂峯挾翠如吾隨遊人如蟻度林杪
細路一線雲間垂茫然四顧動心魄嵐光蕩秀浮雙眉
路迴寶刹忽風墜大鵬九萬離天池林烟媚景翳復吐
欲見不見神護持松藏雷雨太陰黑泉林巖藪銀虹馳
我來青帝已迴馭太古殘雪猶離離一聲鴉鳩百花落

兩崖紅雨春淋漓笑驅虎豹坐盤礴悠悠萬古歸支頤
須臾興盡下寥廓長風入送雲邊詩蓬萊兜率杳何處
無乃造物移於斯往年夢裏記曾到先聲已爲猿鶴知
惜無奇語勒丹壁坐令清賞成絕癡斜陽忽將暝色至
山靈應怪歸鞍遲人間勝事忌多取毋使樂極還生悲

五

贈劉仲憲

并序

元本衡

仲憲衛州人以儒掾臺省者十餘年清苦如一

日人饋遺皆不受能詩喜談政治嘗謂爲天下
不自農桑始三代之盛終不能致間嘗叩之其
言激切或至淚下余器其人類古君子故以詩
贈之

廟堂鼎食窮水陸風紀惠文寒聳玉而君名位不省臺
常見私憂結眉目竭來我過白所懷如在未伸功未錄
諄諄三代治安本修水火金并土木烝民旣粒教乃敷
和氣春風生比屋自從秦鞅廢井田王政絲棼民濕束
利歸兼并富囓貧萬世禍基從此築漢興文帝殊有爲
瓦礫黃金金玉粟蠹農一切悉禁絕千耦如雲四郊綠
下及魏晉隋若唐或耀武功或貨贖盡剝民力供上需

何異養身還餌毒間時偶爾值小登悔禍元出天公獨
勸農使者徒上功虛麗祗堪文案牘繹騷後迨五季間
競投錢鏹懸刀錮民間十室九皆空父子幾何不溝瀆
吾元有國天所資世祖躬歷艱難熟未遑禮樂刑政頒
首闡司農性稽督至今在在著作林枝幹排雲葉猶沃
當時治效槩可知行不齊糧居露宿茲非前聖後聖規
豈特千年萬年福統元欲復今何難政坐因仍弗加勗
駿奔期會誇獨賢深竟根株銜能獄毀方求媚爲通融
滌垢搜瘕稱榦局嗚呼是豈經遠圖刑剝誰虞覆公餗
孟氏古稱王佐才照世格言星日煜論治略無奇異聞
唯說耕桑與鷄畜使當此日出此言可比諸公盡顰頤
聖賢於彼非不知但恐違天拂民欲竊嘗窺管得一班
端本澄源在當軸仍擇師帥專撫綏且論臬司精考鞠
灼行黜陟表情勤重立賞罰旌慝淑如斯下土不裕寧
伏鑽市朝甘顯戮我聞其語汗雨如始也解頤終項縮
半生醉夢鄭衛音一旦醒心韶濩曲劉君劉君策固佳
俯仰悠悠知者孰傳存拾潘示永箴書著興戎昭徃躅
君不見東家求官交近侍西家豪富相徵逐奈何溫飽

不自謀日爲黎黔欲長哭我知君心如古人我知君才
非世俗子牟身遠志在廷梁父調高音振谷賈生流涕
斗虎關屈叟甘心堊魚腹舊聞造物輔善良比歲看來
亦翻覆紛紛已往始莫論目擊試將吾友卜承家千里
止一男半夜麒麟去何速淚巾未燥女又殤蘭玉埋香
見無復士夫固以貧爲常門戶邦堪禍相屬我嘗送米
猶見却一芥他人肯輕觸處勤節義愈凜然風雪倒山
松柏蠹邇來蹤跡尤可嗟十倍戒途輿脫輻勞勞簿領
頭班白承務酬官在昏迷否極或者泰運還有詔吏止

七品服君由弱冠冠儒冠一槩誰分鷲與鵬世間屯難
表裏攻阮籍途窮未爲促昨朝跋馬過所居圭華荒涼
雀堪撲座無裊褥甌生塵度有詩書盤苜蓿歸來歎羨
原憲貧却顧輕肥還自慙蹇余亦本山野民仕路強趨
終踏濁向非親命須官爲定買烟霞事耕斲書生所見
畧然同欲奮不能寧韞積因知世事如意少詎止君家
爲不足子孫筍列多冥頑玉帛山堆足憂辱國忠貴顯
奴隸憎黃憲清貧古今伏人生果在官有無可與智言
難衆告令今春晨霽色雨洗新羣木疎明麗朝旭一杯陶寫

千古情我起踏筵君擊筑天開羅幌雲千疊地展錦屏
山四簇不須華俎釘薨鱣政要露杯羞杞菊須臾酩酊
彼此忘哀玉滿庭風動竹

五
過長春宮

往年嘗夢蓬萊宮三山鼇背搖虛空滄溟俯視一衣帶
銀河鼓浪來天風茲遊良不異疇昔半日倘怳迷西東
平生頗似有仙分足跡未到神先通層樓複觀此誰構
只疑天巧非人工繞簷松影黑於海步驚棲鶴翔雲中
西山亦喜得佳客巍峩相向如爭功遼金興廢渺何許
令人一笑憐鷄蟲須臾遍歷至方丈壺酒盤果羅青紅
心清已覺破煩暑左右况復扇兩童道人見我樂幽勝
故爲留戀談無窮鼎鑄百沸失膏火風水萬里忘萍蓬
默求詩句爲相答半醉揮出毫端虹烟雲滿室動鬼神
不但爲彼開盲聾笑談人境兩相稱此會詎與尋常同
却愁歸去到塵世又隨俗迹墮樊籠

五
三
西巖醉筆

興來放步白雲嶺海濶天高異人境亂山萬馬東南馳
只恐郊原碎俄頃乾坤誰管白鳥閑閑今古空餘野烟冷

何當結屋最上頭擺脫塵紛事幽屏

四月廿二日飯後點曷是日寄宋本老泉集至海上殊難為懷

元張文忠公歸田類藁卷十六

歷城 張養浩希孟氏 撰

同邑後學 周永年書昌氏 校刊

五言律詩

公退書四知堂壁

邑壯憐才弱官微慮患深韋弦千古意冰蘖一生心袖
有歸來賦囊無暮夜金二年何所得憔悴雪盈簪

上都道中二首

窮馭惟沙漠昔聞今信然行人鬢有雪野店竈無烟白

草牛羊地黃雲鵬鶚天故鄉何處是愁絕晚風前
幽都風土異六月亦冰霜草池寬於海土山低似牆姑
毛民簡古嚙雪客荒涼自媿成何事子然天一方

御河舟中

水路苦多阻扁舟之字行去雲猶雨點來浪自風聲顛
倒驚人影經過問地名胡床掩樓底未覺負鷗盟

久雨初霽書所寓壁

癡雨歇簷滴頑雲開日華冗垣驚暗笋捨地惜幽花市
隱靜於野客居闌似家故園亦皆寓心定自無譁

自堂邑移改博平權縣事

吾邑堪藏拙胡爲又此臨四知民過譽三語吏驚心越
俎慚非據操刀媿不任幽懷誰與語風竹有清音

送宋故文丞相孫章甫上西省都事

之子名臣裔何堪簿領拘盤根知利器滄海見遺珠河
出崑崙遠山餘碣石孤翠紅蓮幙底佳句未應無

送姚學士

游目當今士獨公文柄操江空孤月白天濶片雲高班
馬知誰配王揚笑爾勞盛名千載後江漢日滔滔

六

雨後行縣

命駕行農事江天欣晚晴泥塗遲馬足風樹遠鶯聲川
迴水雲活花濃田野明長官非酷吏耆老不須驚

六

廉園秋日即事

雲物經秋慘陂塘過雨渾身闕韻簡策意得略琴尊強
聒蟬多事輕離燕寡思吾詩雖數語喜欲筆諸門

六

廉園會飲

倥偬常終歲從容偶此閑霧松遮老醜雪石護蒼頑池
小能容月牆低不得山殷勤問沙鳥肯與側其間

六

晨興用俞立之韻就贈

寒碧洲痕淺深青地勢平崑姿呈雅淡樹影碎空明
納一天曉人懷千古榮移床高處坐遙看日東生

六

冬夜早起

推枕人初起出門星尚存歲寒郊野濶天早樹林昏
影猶殘月鷄聲已遠邨孜孜何所事時取故書溫

六

我愛雲莊好九首

我愛雲莊好夕煙樹半腰亭高無近矚歲樂有新謠農
糞初開地童梁已壞橋眼前皆事業何必立人朝

我愛雲莊好幽深稱隱居許生好山水陶令樂琴書
梨柿風霜後松筠雨露餘徜徉今數載心賞一如初

我愛雲莊好溪流轉玉虹驚颺荷背白殘照鳥身紅
遠意微茫外真歡放浪中終身能若此甘作灌園翁

我愛雲莊好依稀孝敬村隣誇蠶就簇奴叱犬當門流
水幽樓谷深衣獨樂園只今誰得此高興欲雲騫

我愛雲莊好柴門谷客稀行田蟲撲帽坐樹蟻緣衣雲
水一銅鏡霜林萬錦機東岡陂故在辭聘未全非

我愛雲莊好絕無聲利塵林篁清耳目編簡肅心神
种放非樵客見宋名臣言行錄焦先豈野人見三國志管寧傳此心幸無

屈烏用更求神

我愛雲莊好衡門晝寂然苔香花覆砌石潤竹通泉獨
處蓬為室閑遊杖挂錢白頭鄉社裏未覺媿前賢

我愛雲莊好光風四季兼泉聲聞隔屋花影見垂簾邱
壑閒如傲門庭靜似嚴箇中何限福動止不須占

我愛雲莊好民風太古淳婦勤絲滿篋兒嬾硯凝塵秦
系唐高士張融齊逸人只因疎散久每每忘冠巾

自松

歸田類稿

卷六

四

忽忽又終日悠悠仍此生道心知有負學術媿無成邱
壑徒留意文章浪得名從今都憂去密體聖賢情

六
二十三
惜鶴十首 并序

其風姿高潔非尋常口品
鶴仙禽也由凡翼非其比恒不為世人所愛而

愛之者往往皆山林中人蓋物以氣合理勢然

也予嘗得其尤者一豢之既久翩躚與人相習

日者為田姬傷其脛凡兩月斃惜哉因取其始

末作十詩將以慰其不幸云爾

購鶴

野處幽獨甚千金得令威挾雲出塵網領月到柴扉

足防颺去遮庭使學飛自今湖上路樹石亦光輝

友鶴

雲雨手翻覆紛紛知己誰元裳真莫逆皓首誓相期把

酒或前舞游山時後隨會當作人語細雨話瑤池

病鶴

渠本仙家種胡為久不安強行時榻翼歌立恐遺丹誰

藥相如渴獨憐范叔寒一鳴雖明明猶自徹雲端

醫鶴

歸田類稿 卷之六
饋藥人空數乘軒氣漸低無心吞餅餌何處覓刀圭
日資丹火杯泉洗羽泥漫令通臂友時復過幽棲

挽鶴

共處人烟外誰期禍乃身九臯空有恨四野欲無春
華表雲應淚瑤臺月亦塵當年林處士泉下定相親

招鶴

歌徹楚人些冥冥恨益增楓林空落月甲帳只寒鐙
仰問天無語升呼谷謾應料隨風露氣飛入亂山層

瘞鶴

非爲恩帷蓋從遊歲月深忍令一杯土埋盡九臯心
致奠攄情素爲銘表德音小松栽尺許悠久庶能尋

憶鶴

玉立昂藏態山中我與君幾年遊賞共一夕死生分
徐步閑窺沼高飛遠帶雲爲誰重起舞倚杖立斜曛

夢鶴

岫幌鐙昏處依稀見瘦軀引吭如有訴側頂不容呼
枕上行雲繞松梢落月孤堪憐漆園叟漫爲蝶區區

圖鶴

百計無從見明牕吮筆圖研朱染霞頂屑玉抹雲襦野
狀雖非似山居亦勝無卻愁風露夜拔宅上天衢

二十四 飲城南劉左丞別墅

繚白汾山露含暉近水亭青林雙窳堵紅樹萬娉婷投
轄從陳醉沉湘笑屈醒黃昏休繼燭海月上青冥

二十五 山行二首

行徐忘路遠偶爾到山村斷嶺雲通氣顛崖樹倒根望
深增嘆色坐久愴吟魂歲莫求田意悠悠孰與論

一嬾將成性春游尚爾勤花歆知雨力水皺見風文碧

落一明月青山半白雲卻愁從此去塵冗又紛紛

二十六 憫農

父子傳衣出夫妻起熟分未言先欲泣乍見內如焚徵
負敲門急充飢飲水勤何當天雨粟四海共懽忻

二十七 鑿池

野性喜觀水開池臨小亭雲天雙玉鏡波日萬金星魚
鳥新歡遠江湖舊夢醒風行文自渙三復聖人經

二十八 晚霽

老懶便幽靜空亭步翠行牽牛上籬落鬪雀下簷楹斜

照慳牕影停雲足野情田園無限樂夫豈爲逃名

二十九 村居春晚

門掩烟霞影間身自覺榮年符天地數心逐水雲盟知
謁無時事深林有暮鶯清風生几硯老子又詩成

三十 晨起三首

夜永起常早微吟步繞籬形癯山亦病腰偃樹尤奇欹
月斜明屋稀星冷浸池戛然田器響隣叟出茅茨
叩戶人求火踰牆犬吠林天疑山外盡雲覺水邊深耿
耿憐身世茫茫慨古今東阡與西陌誰識暮年心

戀枕嫌多夢開簾曙色迷鶴寒依戶立猿餒近厨啼蹴
石泉鳴屋吞烟樹隱隄村居真可喜觸處是詩題

三十一 池上

地僻有餘勝扶筇步繞池鶴欣常自舞魚定恍如癡野
日融春意籬烟動午炊笑呼華與鵲聽我綽然詩

三十二 半仙亭獨坐

世路謝奔走雲山隨起居雨晴花窈窕風夕水紆餘膠
漆漁樵我筌蹄筆硯書浮生星火底真悟者誰與

三十三 乙丑山中拜詔

門外傳呼詔堂前散盡雲恩榮被林木惶懼到鷗羣才
拙疎經濟學荒寡見聞五年凡五聘深愧報無勲

六
三十四
磐石

晚晴磐石上秋與興無垠止水可觀性好山堪醉人羣
金明野景幽獨遠囂塵野鶴忽飛起詩成應又新

六
三十五
客中寒食

鶯燕與春競綺羅乘夜遊東君何似儻北客獨淹留
藻先瑩夢萍蓬故國愁冥冥心語口何日大刀頭

六
三十六
觀菊

始旦起觀菊滿籬金翠明色嚴霜亦懼香盛世皆清凜
有英雄氣泊無兒女情柴桑與吾土元自不多爭

六
三十七
半仙亭秋暮

野處宜秋景霜林遠更紅虎溪無俗駕鶴警有仙風稿
葉鏗然下新題偶爾工閒來檢身世頗覺昔人同

六
三十八
遂閑堂獨坐

疎拙閑宜處豪華老自降瓶梅疎浸玉庭檜密聯幢
猫
嚙硯池水鶴眠書舍牕村居吾所喜非擬鹿門龐

六
三十九
早起

謝政身無責家人怪宿與東枯吹鼎火鑿凍汲池水鴉
宿聲俱寂鶴寒影欲凝湛然平旦氣自覺與多增

四月廿一日校過此本少詩十首當令蘭姬別寫補入

歸田類稿卷十六

十月十一日夜據元刻復勘一過

元張文忠公歸田類藁卷十七

歷城 張養浩希孟氏 撰

同邑後學

周永年書昌氏
毛 荃載之氏 校刊

七言律詩一

過舜祠

時年十七

太古淳風叫不還荒祠每過為愁顏蒼生有感歌謠外
黃屋無心揖讓閒一井尚存當日水九疑空憶舊時山
能令子孝師千古瞽叟元來不是頑

登泰山

風雲一舉到天關快意平生有此觀萬古齊州煙九點
五更滄海日三竿向來井處方知隘今後巢居亦覺寬
笑拍洪崖詠新作滿空笙鶴下高寒

和田師孟春夕韻

翠暉紅濡雨霽初一軒深靚稱幽居艷雲流月天機妙
華表撐秋鶴影孤勘破宦途盤谷序蹴開天網漆園書
何時舊憶相携去君種山田我水漁

驛途小憩書田家壁

疎麻浙漑露藩籬雞犬花陰白日遲杯飲窪樽存太古
標枝野鹿見今茲荒城路轉山孤聳古廟墻摧樹半欹
我本三生田舍叟買牛賣劍定何時

直省

是非榮辱日相尋壯歲何堪白髮侵三釜若非親有命
片帆應與世無心天公所靳惟清福交友難逢是賞音
何日超然遂初志溪山佳處恣登臨

初拜堂邑縣尹

一縣安危任不輕初聞恩命喜愁并徒勞人爾豈吾意
何以報之惟此誠操刃豈容傷美錦循牆誰敢望高名

前賢爲尹規模在他日須期與抗衡

堂邑遠心亭飲歸

小雨林梢生暮寒野亭朋酒暫盤桓
美蒼始見春風巧作牧方知政事難
吉網羅鉗非我志堯年舜日儘民歡
他時考績甘書下自有知音後世看

登憫忠閣

一閣渾疑鬼構成倚欄天外壯心驚
河山都向掌中見雲霧忽從胸次生
死戰一時皆朽骨憫忠千古定虛名
只今兵裏臯比了留與殘僧樂盛平

飲平則門外崔氏別墅

十年夢斷鑑湖春彷彿中郎賴虎賁
佩解瓊瑰愁漢女機闌雲錦失天孫
日光亂軌波光碎野色遙連樹色昏
愛殺主人清且古相邀石上共窪樽

元日朝賀

綿蕤區區笑叔孫聖元自邁漢君臣
鳳龍齊舞雲閒樂虎象爭輸海外珍
仙仗分開丹禁曉朝班浮動翠華春
與天同大惟王者今日方知此語真

挽劉夢吉先生

白髮山林僅四旬兩朝不肯屈經綸才名暗折世間壽
氣節偉高天下人康節縱吟無限樂希夷高卧有餘春
一生懷抱誰能識他日休猜作逸民

過中都

三月龍沙春未知雲山環野玉參差半空蜃氣雲間闕
一路驪珠馬上詩豐沛漢皇湯沐邑幽岐周室治平基
我來歷覽開天處億萬斯年理固宜

題康信夫宅湖石

翠竇寒生太古苔乾坤元氣此胚胎一峯雷震崑崙裂
七竅神剗混沌開呼丈便宜床下拜和雲誰負座閒來
不須更作山林計已覺高情隘九垓

送德機赴海北道憲司知事

金薤銀鈎兩絕奇才華江右捨君誰一官毛義榮親日
千里呂安懷友時叫斷霜天鴻鴈瘦吟殘山月鳳鸞飢
從今夜夜江湖夢說似楊花未必知

早春郊外

去歲春光蝶夢空今年邂逅又東風岸水欲泮猶蒙甲
汀草將抽尚鞠躬一氣未嘗停晝夜百花何處認青紅

新詩亦在氤氳裏說與當年太極翁

春日水邊

袖拂烟霞坐釣磯登臨終日澹忘歸鶴嫌客俗穿雲去
燕喜春陰掠地飛樓外長江流世事雨邊殘照媚林霏
一闌久與時清遠情尚賴東風不我違

城樓晚眺

禹跡茫茫畫九州斜陽古意滿林邱嘯呼風月來詩卷
醉挽山河入酒甌華髮半簪天與老丹楓兩岸水分秋
逢人莫話功名事且道甘心落魄休

秋夜枕上

繞屋江聲風夜呼一燈搖影客窗虛俗緣去盡猶懷土
習氣未除尚嗜書猶今古等爲浮世夢林泉空憶故山居
何時真遂平生志野鶴孤雲縱所如

寄歷下諸生

張飲東秦記昔年衣冠傾倒漢陵園禮忘賓主觥籌亂
聲攪絃歌笑語喧世路勞形真左計人生行樂是名言
舊游回首何時復腸斷春風灤水源

過東方朔廟

先生高識絕當時誰道偷桃舊小兒
揖讓不逢三代盛滑稽聊免一身危
草荒漢構雲承宇苔蝕顏書雨澁碑
我亦從來惡苛禮斜陽遙望醉空卮

三十四 題廉野雲城南別墅

鐘鼎山林果孰優羨公騎鶴上揚州
田園獨占人間勝懷抱尚餘天下憂
公之父有堂名德樂好為習池留故事未應綠
野美前修半生乾沒塵埃底羞向滄浪照白頭

三十六 承宣堂早衙

桴鼓無聲獄市清南風吹綠滿槐廳
要囚報念五六日華髮又添三四莖
胥吏把書趨鴈鶩才兵持挺趾堦庭
職微尚恐才難稱敢效龐公醉不醒

三十八 齋居春暮

漂泊東君底處家落紅風捲赤城霞
半窻春夢子規月滿院客愁楊柳花
世事悠悠惟欠酒棠陰密密欲藏鴉
韶光九十須臾頃不是劉郎髮易華

三十九 中都雷家站枕上

紅塵瀕洞路間關又見東風馬首還
報國丹心炳星日壓頭白髮重邱山
休疑奉檄毛生喜莫羨歸田靖節閑

歸田類稿 卷一
說與春知亦絕倒論人不在去留間

四十 送趙道士出祠南岳

閨苑仙人雲錦裳天風絳節恣徜徉紫簫吹月山雞舞
寶劍飛空海若藏靈隱依然存故我勝游聊爾歷遐荒
三生我亦烟霞客追逐無從鬢欲霜

四十一 雪後過張秋泉盆花盛開索詩爲賦

道人冥坐養黃芽百順薰蒸到物華風暗玉塵門外雪
春明銀燭坐間花座潛移造化韓湘子高踏塵埃蔡少霞
却笑三郎無伎倆謾令羯鼓不停搗

四十二 郊原清曉

清曉郊原望翠微隱如波浪與雲齊老夫粟里懷方切
浮世槐安夢正迷政白雪參平鷺鶴浦黃雲翻動稻梁畦
昨宵怪有維魚兆釣艇相銜水滿溪

四十三 京師除夕

旅食京華歲又殘悠悠身去去留難身能安分賢於隱
子肯讀書貴似官潦倒乾坤雙鬢禿淒涼今古一燈寒
明朝五十從頭數且盡椒盤此夜歡

四十四 李漑之還山隱居

歸田類稿 卷之七
厭直承明拂袖東此懷未易語諸公高情野鶴雲霄外
往事醯雞瓮盎中八表謫仙鯨海月一襟高士虎溪風
墨頭莫訝歸來早政要山林伴退翁

七
四十五

過沛縣高祖廟

天厭苛秦欲世蘇赤龍從此入西都五年諸國破迎刃
四海一朝安覆盂山峙尚疑神劍在雲飛猶與大風俱
不知萬歲千秋後魂魄端能到此無

七
四十六

登徐州項王戲馬臺

咄彼重瞳太計疎欲憑扛鼎帝堪與鴻門老叟無奇策
烏岸漁人有遠圖佇目河山空錦繡傷心劉項總邱墟
經過莫笑書生懦我亦毫端敵萬夫

七
四十七

過錢塘

天上鈞天杳莫攀繁華移在武林間樓臺萬井蔽虧日
烟水四圍搖撼山花草故宮春一夢江湖遊子鬢雙斑
此心只恐移聲色舟促篙師半夜還

七
四十八

游西湖

一片樓臺四面山玻璃搖碎錦爛斑畫船載酒來天上
寶月和雲落世間千古風烟留客醉幾時魚鳥伴余閒

乃知西子真尤物竟日令人不欲還

四十九 游靈隱寺

常憐無地蛻塵烟緣今人向空門見性天一路密松山左右
半空飛瀑寺旁前馴猿就手取新果老衲鞠躬參舊禪
歸去不妨燈火晚與君同看萬家蓮

七 五十一 興化道中

駭目樟榕樹半天雄陰翠壓道途邊滿城香火民風鬼
到處樓臺海市山驛路遠因山曲折僧居喧為水潄溪
有時檢點奚奴錦盡覺新詩帶瘴烟

七十二 福州

聞說東南秀所鍾此行處處覺詩工飛來天上三山島
驚倒人間百歲翁荔子種成唐室禍蘆花飄滿越王宮
斜陽無限興亡恨何事烟波尚爾東

七 五十五 過髮冠仙姑隱所

抗塵自覺道無緣何幸能參杖履前春色九天歸絳節
靄雲一朵冠華顛馳神夜宴西王母御氣時尋姑射仙
四海異人今日見此行萬里不徒然

七 五十六 貢院試筆

斯道寥寥百許年天開文運到吾元鑑衡別物寧容意
桃李成蹊不待言下筆園林驚落葉得人麟鳳瑞中原
潛心爲向朱衣道莫使劉蕢李豸冤

五十七 詔五十以上未第者賜出身有差

吾皇仁聖邁勳華重爲斯文掩類瑕漢苑有林皆桂樹
禹門無浪不桃花殊恩遠紹千餘載和氣勞延百萬家
比屋可封今起本歡餘不覺淚橫斜

五十八 直省 時爲左
司都事

翠蔭長廊樹影深塵喧收盡鳥遺音古今吾道窮途恨
日夜家山故國心花簇鳳池春欲古雲連仙島晝常陰
書生習氣真堪笑簿領如山尚苦吟

五十九 辭參議還家

平昔爲官本爲親歸來一意奉常珍都將丹漏門前曉
辦作斑衣膝下春忠孝誰云難遂意始終今喜得全身
呼兒爲我修園圃從此無心走世塵

六十 挽元復初

韓孟雲龍上下從豈期神物去無踪知君本自雄才刃
顧我安能直箭鋒一死一生空世隔三薰三沐爲誰容

平生碑版天留在不朽何須藉景鐘

遊華不注

蒼烟萬頃插孤岑未許君山冠古今翠刃剗雲天倚劍
白頭歸第日揮金攀援直欲窮危頂歌舞休教阻盛心
星月滿湖歸路晚不妨吟棹碎清陰

同鄉友宴會波樓

久處紅塵眼倦開飄然今喜到蓬萊春風碧水雙鷗沒
落日青山萬馬來柳外行舟喧鼓吹途中過客指樓臺
一時人境俱相稱却恐新詩未易裁

游香山

常恐塵紛汨寸心好山時復一登臨長風將月出滄海
老柏與雲藏太陰寶刹千間窮土木殘碑一片失遼金
丹崖不用題名姓俯仰人間又古今

同元復初飲許仲文別墅

曉日樓臺海市仙春風歌吹酒家天五雲分彩來瓊島
兩鶴聯飛下玉田流水故將塵隔斷好花都被雨開全
人生佳處無何國鍾鼎山林恐未然

過顏魯公廟

李唐失紀相非夫竟遣忠良與禍俱抗敵一身皆是胆
留名千古不因書極知暮境桑榆近爭忍清時社稷孤
下馬荒祠訪道躅北風吹樹渺愁余

上都察院

柏臺人散坐堆厖默記灤江四往廻髮為鷹冠容易雪
心因蝸角等閒灰慚無元素迴天策空負坡仙酌月杯
兩處飄零家萬里亂山遮斷白雲堆

秋日梨花

雪香吹盡樹頭春誰遣西風為返魂月影已非前日夢
雨容獨帶舊時痕只知秋色千林老爭信陽春一脈存
莫訝殷韓太多事仙家元不計寒暄

九日

一行作吏廢歡遊九日登臨擬盡酬詩有少陵難着語
菊無元亮不成秋雲山自笑頭將鶴入海誰知我亦鷗
幸遇佳辰莫辭醉浮雲今古劇悠悠

大雨不用風雲雷
霆江海等字

六合乾坤一太陰仰觀毛髮為蕭森排空疑有鬼爭戰
對面不聞人語音元氣只愁今日渴桑田更比向來深

歸田類稿 卷之七
須臾林杪標新霽一抹斜陽徑欲沉

二十三
寒食遊廉園

湖天過雨澹春容輦路迢迢失輦紅花柳巧爲鶯燕地
管絃遙遞綺羅風羣仙出沒空明裏千古銷沉感慨中
免俗未能君莫笑賞心吾亦與人同

二十四
留別元復初

臺閣聯飛二十年臨岐欲別重凄然人言廉藺才相軋
誰信雷陳志愈堅古井不妨風浩浩浮雲何損月娟娟
江湖秋淨多來鴈莫惜平安到瘴烟

二十五
中都道中

細草和烟展翠茵雜花勻簇道旁春鳴禽曠野棲無樹
破屋荒山住有人露濕弊袍寒襯月風餐行鉢暗凝塵
去年閩海今沙漠贏得霜華鏡裏新

二十六
客中除夕

野帷蕤蕤不耐官強顏塵土步邯鄲移文久爲雲山笑
捧檄聊供菽水歡香返梅魂春一脈愁叢燈影夜千端
古人事業余何有羞見茅齋歲又闌

二十七
直省

微風吹雨濕層陰寂寂長廊靜足音怒虎九關天日遠
冥鴻一線海雲深求田素有陳登志作吏初非叔夜心
說與飢鳶休嚇我掉頭巢父正長吟

七
三十五

留別鄉里諸友

粉署銜香十許年故鄉重到重流連子牟戀闕心空赤
江總還家髮尚元金縷歌殘華鵲月蘭舟搖碎灤湖烟
一襟離恨東州路莫訝羸驂不肯前

七
三十六

與和道中

底事勞勞形與神道途鞍馬動經旬烟橫絕澗疑無地
風響深林似有人早發舉鞭揮霧露夜行翹首認星辰
何時却逐桑榆曉愛殺坡仙此語真

七
三十七

建寧道中

行盡溪山得市廛橋樓深入路綿延商帆腥帶諸蕃雨
天宇昏連百粵烟言語不通剛作字道途良苦且停鞭
老兵來報肩輿穩使我愀然媿昔賢

七
三十八

泉州

萬里飄零兩鬢華瘴烟爲屋海爲家山無高下皆行水
樹不秋冬盡放花得句珠還合浦月亂懷杯吸赤城霞

歸田類稿 卷十七
蓬萊咫尺無由到，慙愧當年犯斗槎。

七
五十四
寄李道復平章

文武全才每許君，逢時談笑建奇勲。世稱李道為賢相，帝重嚴陵是故人。滄海兩扶新日月，青天一掃舊烟雲。盛名自古多難處，好及明時乞此身。

七
六十一
黃州道中

濯足常思萬里流，幾年塵迹意悠悠。閑雲一片不成雨，黃葉滿城都是秋。落日斷鴻天外路，西風長笛水邊樓。夢迴已悟人間世，猶向邯鄲語舊遊。

歸田類稿十七卷

七
六十二
登會波樓

何處登臨思不窮，城樓高倚半天風。鳥飛雲錦千層外，人在丹青萬幅中。景物相誇春巨野，古今皆夢水連空。濃粧淡抹坡仙句，獨許西湖恐未工。

四月廿二日檢過

歸田類稿 卷十七 五

元張文忠公歸田類稿卷十八

歷城張養浩希孟氏撰

同邑後學

周永年書昌氏校刊

七言律詩二

登歷下亭

僮年嘗記此游遨
邂逅重來感二毛
翠繞軒窗山陸續
玉縈城郭水周遭
風烟誰道江南好
人物都傳海右高
怪底登臨詩興淺
鵲華曾見謫仙豪

飲城東劉氏園亭

昨日餘醒尙未醒玉溪絲竹又尋盟爛遊債我從前債
沈醉由他已後名雨點殘紅花意動風敲疎翠竹陰清
閒來吟嘯無虛日未覺歸田負此生

哭張澹菴平章

平生許國膽困輪諤諤危言不顧身人道龍逢非俊物
我知汝黯是忠臣轅駒仗馬寧無媿縛虎擒蛟似有神
故劍年來漸零落計聞不覺淚沾巾

翠陰亭獨坐寄莫峻德經歷

抗俗支塵力不在故園歸卧遂初心近山障霧還疑遠
淺水涵天却訝深有幸鷗盟君與我無情鶴髮古猶今
年來酷愛香山老都把悠悠付醉吟

秋夜露坐觀月

亂雲風靡散縱橫老子胡床對月明六合透光天一色
萬家生白夜三更露從丹桂香邊滴詩到瑤臺影裏成
安得騎鯨上寥廓細將摩撫看虧盈

釣突泉

繞欄驚視重徘徊流水緣何自作堆三尺不消平地雪
四時常吼半空雷深通滄海愁波盡怒撼秋風恐岸摧

每過塵懷為滿灑斜陽欲沒未能回

秋郊晚眺二首

六鑿相攘久失平歸來方覺此心清湖山日與軒窗對

猿鶴時隨杖履行隴上黃雲秋有望鏡中白雪晚無成

衰翁本自疎經濟誤得徵君一世名

恐富求歸王晉平千年心迹喜雙清天低似盡地形斷

山暗欲隨雲氣行塵外景因人更勝閑中懶與慢相成

韓康只道潛身了已被時人識姓名

問其故曰此郡沃壤珍阜日至人所昧者財財生則禍

賢路見本傳

寄省參議王繼學諸友白和十首

曩昔塵奔為悅親而今雲卧復天真山林充隱當容我

館閣求賢豈乏人噩夢久隨風散曙衰容難與物爭春

綽然烟景無窮在莫怪沙鷗不易馴

身與功名果孰親萬鍾何似一瓢真若教宇宙無難事

未必山林有退人遺語五千方外教行窩十二洛中春

老懷久矣忘機巧猿鶴欣欣燕雀馴

木密垂枝手可親奴僮羅勒味尤真詩情滄海騎鯨客

世故青樓擲鼠人

子列

庭樹有陰僧結夏
野花無語女懷

春清風一榻茅簷底

六賊三尸亦漸馴

大許 姬偶見郝隆 與桓溫詩語

鹿豕同遊木石親
家山歸卧偽邪真
情知五袞懸輿客

肯作千金鬻帝人
往事回頭皆噩夢
故園投足總陽春

麒麟掣斷黃金鎖
為問羣仙孰可馴

筆硯琴書素所親
名利常恐泪吾真
客頻惟以病辭酒

景勝却愁詩迫人
斷岸樹連衣帶水
好山天展畫圖春

卜鄰自得孫期氏
獷俗年來喜漸馴

後漢孫期德化 一方見本傳

歎初吾與物俱親
漸喜年來喻道真
心至草間石作虎

魂離山上樹疑人
息機反照三緘口
變燧回星幾過春

從到綽然亭子上
韓家五鬼亦俱馴

好爵於余豈不親
思之爛熟見之真
誰知狗貨攫金客

不可越鄉懷壁人
莊叟濠梁魚自樂
虎溪精舍草仍春

一琴一榻書千卷
明哲他年庶致馴

密邇雲山欲我親
高情未覺滅元真
不求天下號奇士

但願里中稱善人
無事舉杯澆邃古
對花落露折香春

一生志義伸無屈
羨殺當年漢召馴

琴簪襪禊日相親
彷彿躬耕鄭子真
晚節中途九十里

八

七

六

五

三

九

野航古渡兩三人愛圖山水王摩詰嬾謁公侯井大春

見後漢井丹傳豪氣平生六軍劔消磨今似女郎馴

諸貴葭草茂有親三年孤苦幸全真膠航朽纜安能海

漆几匡牀極可人黃妳肉忘三月味燕胥鏡納八荒春

刀圭自入談天口百怪千魔一向馴

九 山中拜除自和十首

深山傳詔自天來萬壑雲隨喜氣開仰報賜環元有志

俯思奪錦奈無才鴈鴻聲斷冥霄漢麋鹿魂驚鬚草萊

君聖臣賢太平日不能重占釣魚臺

二 角巾憶昨故鄉來黃菊西風見六開道在去留從物議

俗殊通介豈吾才飛昇未信海無藥陶寫且歌山有萊

衰老於何息形影梅邊亭檄竹邊臺

三 窻下孔賓歸去來春隨三十六宮開虛言徒使燕人淚

列實用休爭楚國才左世外此心無芥蒂海中何物是

蓬萊漫郎耳順宜知止誰敢重塵視草臺

十 文季休歌子夜來淵明白拆瓮醅開舉觴月與春挑戰

得句人驚天假才尚友誰能追北海尋真吾欲候東萊

見漢武求仙事何時晤對安心鏡拂落菱花不用臺

四

快喚青州從事來浮生能幾笑顏開吹殘池錦風無狀
洗出山屏雨有才久別故人驚夢薤倦游老子逐烟萊
少陵鬢影如今許誰更狂歌上吹臺

五

禍福循環互相來注幾人蹴踏鬼門開劉伶度世醉還醉
莊叟處身才不才甘雨安能限苗稼春風未信畧蒿萊
冥思亘古真堪笑賢否均歸一化臺見唐姚勗傳

六

雲送沙頭屬玉來風吹亭下水芝開須知問舍求田叟
那有經天緯地才我喜捲金巢飲樹誰期食菜國封萊
若將吟醉論功償老子宜專郭隗臺

七

捲簾風與月俱來滿地瓊瑤掃不開赤壁磯頭皆酒典
輞川圖上盡詩才天教疎散全山木誰說英豪死野萊

見唐魏元忠薦王義方事一笑烟雲生腳底只疑身到紫微臺北岳恒山

一名紫微臺見李思聽淵集

八

庭空有鳥去還來天遠碧雲合又開玉井睡山山今古夢
錦囊詞客鬼神才琴書有味隨烏几徑路無媒滿翠萊
跌坐遂閑香一炷何人走馬過章臺別墅有堂曰遂閑

九

不速三人自遠來雲莊莊上正花開獨憐山似營邱畫
共訝河如孝伯才才如河注見魏崔光傳愛惜鴛鴦休打鴨扶持

黍稷必芟萊高眠何敢輕軒冕直恐時人尋謗臺見唐李景

讓傳

雲莊遣興自和十首

投閑自笑未能閑猶有微營方寸間亂撥浮萍嫌蓋水
稀栽垂柳恐遮山萬金難買田園福一醉從教鬢髮斑
脫帽解衣磐石上和雲坐看鳥飛還

伊誰知我此時閑笑領白雲入坐間座號國門前何少我
元龍樓上儘多山向來矛戟蝸雙角此去琴書豹一斑
可是綽然風景好斜陽吟落不知還

飛黃幸爾出天閑自在忘機草野間田種有時灌藉水
村居無處不宜山半簷殘照餘金彩一徑雜花亂錦斑
三十餘年星火底豈惟倦鳥解知還

中年才過卽歸閑好在河汾屋數間病裏檢書多爲葯
老來忘世不因山翠翻平野禾和抽穎錦委深林筍脫斑
莫恨韶光太相促若非衰莫暮詎能還

非是幽人酷愛閑無窮佳思水雲間兒要去鶴斜趨徑
童覓亡羊直越山坐喜簷牙搖竹影行嫌屐齒破苔斑
杜陵棗熟從人打快喚王陽去婦還

雞犬衡門竟日閑挾書移榻坐花間淡無情緒烟中柳

暴有精神雨後山便可懾雲尋李愿莫教看日後劉琰

見宋劉湛忘機卻是長生訣何必滄溟訪大還

歸來心迹兩俱閑日日春生几案間有土不多唯種秫

無人可語只觀山隔窻竹韻風敵玉匝砌苔痕雨漬斑

說與王生莫相請從今老大不家還見宋王僧達譏何尚之復起事

故園輪指六年閑盡委身心筆硯間人世虛如盧客夢

野雲奇似郭熙山義經自契先天妙殷鼎猶存太古斑

圖史滿前琴掛壁恍疑太素為余還

半世求閑始得間醯雞飛去瓮中間盆池遊戲均滄海

塊石達觀即太山對酒便當烹郭索傷人且莫語黃斑

虎也見隋書風烟滿月歸來好物我從今付八還

人云五十未宜閑我道彭錢亦夢間五斗折腰慚作縣

一生開口愛談山荒邨未莫門先掩老樹才秋葉已斑

只恐溪翁厭喧聒隔林遙喚野猿還

綽然亭落成自和十首

莫疑五十便懸車要讀從前未讀書野鶴孤雲天曠蕩

嶺猿明月樹蕭疎南柯國裏春無幾西塞山邊景有餘

半世紅塵今得此不妨造物巧乘除

地僻門無長者車身閑不遺子公書羣仙侑坐人堪醉

萬事忘懷世自疎碧玉濫池新雨後綠雲滃徑落花餘

憑誰喚起濂溪老聽說窻前草不除

欵段閑身下澤車少游此語可紳書園花撥亂嫌春冗

窻竹芟煩愛月疎只把酒償前日欠未應詩出古人餘

東阡南陌時來往平昔私憂已盡除

淺學金銀不識車況能憑几口占書見漢陳一枝守分

因才拙三事力辭非計疏於陵仲子不就稚子養鷄為

鶴伴田翁飼犢與蠶餘從今蓮社從教醉百歲浮生大

半除

鳩藤鳧舄代安車踏碎沙頭鳥迹書漁父放舟迷遠近

達人觀竹畧親疏水文即是風蹤迹雲影無非雨緒餘

莫笑太元終寂寞平章花月幾新除

張弧休驚鬼一車吞爻今悟夢中書清閑豈敢班九老

燕樂未應慚二疏禪榻鬢絲衰暮際賓筵塵尾笑談餘

人間晦朔無心問誰更新詩體建除

門外紅塵幾覆車閑愁元不到琴書天何負物物天負

我不疎山山我疎歲月推移身有限乾坤呈露景無餘
只因田里堪容拙豪氣而今尚未除

緩步休乘八陣車

晉馬隆衣八陣圖作徧香車見本傳

高言賦不草萬言書

但教眼底青山在誰問頭邊白髮疎悟道未能曾一唯

積功且盡董三餘

魏董遇勸學者以三餘讀書

古人儻使今留在甘

向門墻事掃除

山林六杆使星車慚媿功無一可書空使時人許高尙

那知學術本空疎任真更在嵇康右屈志誰餐穆壽餘

壽後魏人封宜都王待諸父見如奴隸見本傳

愛殺田家風景好杯盤妻子坐

庭除

僮挾琴尊子御車丹崖到處總堪書白雲有志尋華表

黃閣無心戀綺疏鼓舌為名憐季子舍身逐利笑陳餘

自從投綬歸來後荆棘胸中自剪除

八

田居白和十首

萍蓬一世百無功轉首俄成六十翁往事鏗舟求墜劍

虛名影暈悟懸弓展開明月清溪澗吹斷香風錦樹空

托意尊鱸歸故里始知張翰是英雄

菱蕖山堆畢歲功殷勤不負荷鋤翁荒村人靜泉鳴佩

遠漢雲高月掛弓鼎鑊江湖魚苦樂枕幃園圃蝶虛空
躬耕谷口君休笑自是沉冥一世雄

自媿明時無寸功歸來日作富家翁廉頗身老遺三矢
陶令田荒不數弓且喜休休閑度日何須咄咄怪書空
半牕風月山房夜卧聽松聲萬壑雄

幽居文史有新功豈止名成田舍翁六載身閑驚迅弩
百年誰謂挽強弓搗殘斜照春聲急搖碎浮雲水影空
歲晚茗溪恣吟嘯不妨長作布衣雄

新花結子樹成功舊筍添孫行亦翁魚泳波心深避餌
鴻飛天外遠防弓鳴琴欲使衆山響宋宗少女善琴書好游凡所歷山皆

圖於壁嘗日鳴琴動操欲令衆山皆響見本傳詠景須令萬象空彈壓鶯花戰
風月未應韜畧下韓雄後周名將

拈椽抽水有餘功抱瓮區區媿老翁游女執筐行采芑
嘉賓舉爵賦彤弓溪流隔斷塵千丈雲氣遮殘樹半空
日落昏鴉成一笑紛紛誰解辨雌雄

風虎雲龍百戰功祇堪供笑綠簑翁但能日識丁一字

見唐書張容靖傳儘勝身彎兩石弓常愛德容行讓步每憐平

叔坐談空漫郎非好居田里只爲人稀易長雄漢鮑宣居長黨

以地宜田牧少豪
俊易長雄見本傳

閑來無過亦無功放浪山林一贅翁
枕石醉眠松作蓋
題詩奇中筆為弓年隨流水歸清鏡
心與閑雲澹碧空
蝸角區區渾幾許寄聲蠻觸莫爭雄

稼穡無非雨露功農家分喜到詩翁
勞心漫刻七年楮
貽歲空成九載弓山展野屏隨地遠
風揮天帚掃雲空

綽然到處皆佳景安得毫端句不雄
七年刻楮見列子
九載修弓見淮南子

政使遭逢有底功如何只作采芝翁
耻迎督郵戕軒冕

後漢馬良為迎督郵毀裂衣冠壞車殺馬見本傳
羞拜梁奴斬馬弓
後魏乙速孤漢保為

漢中郡都梁奴來冠慮不敵轉馬與弓自刎
涉世始知官至苦對花方悟色

真空高眠勿聽陂塘雨一片荷聲特地雄

十三 同諭仁本登標山

香風吹袂落巖花步盡紅雲景益佳
龍虎郊原山障日
鳳麟洲渚水明霞藍田有玉常春色
石室無人漫歲華
從此風烟添勝槩老夫絕壁醉揮鴉

歸田歸稿卷十八
十月十五日夜三鼓檮爐校記
四月廿三日早起坐廊下對芍藥花讀此卷畢

元張文忠公歸田類藁卷十九

歷城

張養浩希孟氏

撰

同邑後學

周永年書昌氏
毛望載之氏

校刊

七言律詩三

讀史有感自和十首

九

治運方開亂已隨
陽奇陰偶見天機
綱常壞自周秦始
禮法傳由漢魏非
歌鳳楚狂聲振野
獲麟宣聖淚沾衣
若無直筆開來世
一脉斯文想更微

善教何心不我隨
底須智力巧為機
每憐鑄鐵作人謬

更覺愁金徙木非千載舒長堯日月九重垂拱舜裳衣

眼中龜鑑昭然在莫信攝提入太微

見武三思飾
奴救早事

揖讓雍容萬喜隨紛紛攘奪費心機前車才覆後車繼
曩日爲公今日非神器果誰承正統博徒亦復着黃衣
雲翻雨覆無從詰可是天公寓意微

季子縱橫六印隨張儀無語不投機周衰遂使諸卿顯
孟出方知二子非豈止古今知軌範要令楊墨盡冠衣
理明天下無難事可惜時君力量微

不信忠良信詭隨於茲可灼亂亡機東京党錮迷臧否
西晉元談混是非被禍枉投冠在地復仇空拔劍揮衣
因知高蹈邱園者不是區區愛翠微

爲善恒難惡易隨事機未曉况先機剥床已及猶言穩
覆鼎將空不悟非盡委貨珍求佛果誰分藍縷到民衣
全 甌休倚完無缺只恐竒災發隱微

作德休徵影響隨一誠端足破千機才如知伯才何益
智似萋宏智愈非言行但宜遵聖軌浮華且莫羨時衣
軒然三命車中舞堪笑渠儂眼孔微

大旆高軒憂患隨可能娛樂故忘機退延多士豈遑飯

進受羣言毋遂非任使貨盈元載物莫教塵化士術
丈夫用世當如此不爾超然賦式微

吉凶消長日相隨此是乾坤造化機物盛則衰奚足訝
功成者去未爲非鷄鶩豈樂金石奏殷鯀烏庸錦繡衣
試問商巖采芝叟功名何啻一毫微

政有經綸孰汝隨疎迂况復動違機久知好瑟吹竽拙
每笑還珠買櫝非幕府高談人側目田園長往子牽衣
分明二者安危在不信君其問子微

唐赤城居士
司馬承禎也

九
二
觀物亭落成

席許池塘斗許齋翛然人境遠塵埃山容低歛烟雲起
荷葉亂鳴風雨來泉石洗心無俗慮郊原^隨適意有詩材
一生雅志今方遂莫作終南捷徑猜

九
三
觀物亭漫興二首

星斗風雲月露烟松筠梅菊蕙蘭荃天教此景全吾隱
誰道還丹屬彼仙飯飽看山行曳杖詩成對客舞當筵
漫郎宦意從來少不爲蘇卿二頃田

一亭環列萬青山竒玩寧容造物慳黃卷真懽名利外
白頭清福水雲間農人場圃深秋畢童子芻蕘薄莫還

碎錦滿庭苔蘚合定知無客到柴關

四

大暑

白戰體

帝德如天本好生誰將虐焰爍生靈乾坤卻願長爲夜
物我還愁遂不醒玉井瑤池皆欲沸華門圭竇若爲寧
何當喚起龍宮睡一雨先秋看建瓴

九

五

和子暈學士見寄韻十首

蔀屋雖非綠野堂歸來六用得深藏時雍擊壤歌堯舜
年邁披書愛老莊林果簇金低蘚徑山泉分玉注蓮塘
無窮湖灤風烟在都把悠悠付坐忘

滿坐清風拙逸堂底須詹尹卜行藏淵明高躅廬山社
摩詰真歡輞口莊花下車聲香覆帽沙頭人影玉沉塘
但行華鵲相招飲多謝山靈不我忘

佳句人傳白雪堂萬人如海一身藏騎鯨有志尋仙李
刺虎無心效卞莊高枕拂雲眠薤谷直鉤和月釣林塘
寄聲沙鳥休飛去老子年來物我忘

時約漁樵會草堂放懷彼此各無藏泉鳴石罅心尤亮
山闖墻頭色亦莊秋意已侵潘叟鬢春魂猶繞謝家塘
從閑經濟心灰盡惟有詩籌未易忘

葯房蓀壁柱蘭堂無限春風此處藏山上挂絲誰夢亮
燈前角奕儘思莊聲寒風雨千竿玉色絆烟霞半畝塘
過客不煩頻振袂紅塵名利自然忘

夢亮在北齊薛琠傳思莊見齊蕭惠

公傳

從閑距躍倦開堂聞客敲門欲壁藏世有古今皆夢境

心無塵垢即仙莊風鳴琴筑鶯啼樹波泛水霜鶴浴堂

唐

六尺方牀隨意卧未應佳思此時忘

見梁賀革傳

青春回首去堂堂衰白侵尋底處藏老我癡蠅鑽故紙

何人肥馬耀康莊翠光挾日山排闥練影翻秋水滿塘

自笑此心猶有著幾時喧寂兩俱忘

非傲軒裳畏廟堂白雲堆裏八年藏每思海上尋徐福

不願山東說鄭莊移石庭中觀岱嶽埋盆窗外幻陂塘

春秋六十猶為此方信童心未易忘

畏廟堂見梁阮孝緒傳

千金子坐不垂堂甘効黃麈井底藏

黃麈事見唐王孝傑傳

誰種

三槐期相位自栽五柳庇山莊呢喃簾幙烏衣國蕩漾

風烟白鳥塘每到綽然亭子上今吾故我一時忘

春滿家園書滿堂是中惟許老夫藏對貧但可類掛杜

著論何須強廢莊我愛萬山圍灤水誰言五絕出錢塘

歸田類稿 卷十九 五
閑中幾度承高作故舊知君未始忘

九
六
秋日村居

衰年卜宅喜山村俗事經年不到門疎雨與秋添索寞
遠烟因晦學黃昏倚松野叟清于鶴偷果溪童捷似猿
莫笑吾廬太孤僻塵囂終勝市朝喧

九
十
木樹

余於緝然亭左右設木榻二蓋榆杏盤根也
一輪困離竒如虎伏一天矯促縮若螭卧而
藏其首余愛其古爲賦是詩

盤結何年出厚坤山房對列鬼潛奔龍頭深縮彌明鼎
虎背橫眠謝傅墩作室已乖梁棟用漬衣猶帶土沙痕
有時坐寐煙霞影尚覺餘春帶夢魂

九
十一
書半仙亭壁自和十首

夢裏雲山久見招歸來懽若布衣交人間萬事老無味
林下一身閑最高牧豎樵童皆我友竹溪花圃亦吾巢
英雄稅駕都如此把菊東籬豈止陶

邱園投老謝麾招相與無非莫逆交破屋帶花紅掩陋
矮墻圍柳翠添高日明窓戶蠨蛸網風動蘭苕翡翠巢

人境清幽塵事少詩成元不費甄陶

自携斗酒赴佳招山市江村錦翠交身健得閑方是福

才疎辭聘本非高謀身安用營三窟容膝惟堪占一巢

犬足生菴田里靜長官共說是劉陶

後漢劉陶為順陽長有惠化既代民

歌曰邑然不樂思我劉君君何時復來安此下民

天際閑雲坐可招墻頭山色淡相交權門非貴閑門貴

醒者何高醉者高搖碎庭烟風動竹衝開林靄鳥歸巢

從閒精力知誰健豈止塵襟解鬱陶

去留心定任相招叔夜何須著絕交祖嶺有詩懷六逸

華峯無路訪三高

五代鄭遨隱居華山與二道士游為三高

終身白刃卑頗

牧亘古清風仰許巢佳客相過適乏酒只談風月亦陶

陶

莫訝漁溪不復招書詩正好結深交地寬飛鳥如爭遠

天濶行雲欲鬪高但可對山時拄笏何須上樹縱探巢

王澄戲人造物從今省夷路從來共一陶

可人密邇若難招俗士紛然每易交流水樹圍三面闕

遠山雲放一頭高坐呼赤脚澆新圃卧看烏衣葺舊巢

衰白太平當自賀試聽工部詠陳陶

缺第十首錄升后並

九

才薄常慚尺一招性孤不耐雨雲交舉頭看鳥回頭錯
 開口驚人閉口高痛飲且須邀北海劇談無用及南巢
 逃名笑殺鴟夷子既氏朱公又氏陶
 鄰家來往不須招吾輩寧同市道交鵲蚌何容爭勝負
 鷓鴣無意校低高人疑地僻如無世我愛民淳似有巢
 和氣春風仁壽域豈惟魚鳥被薰陶

十二

翠陰亭落成自和十首

一 退愁城萬里降從今安堵樂吾邦睡殘蕙月猿推枕
 吟斷松風鶴啄窻槁木不春從換歲虛舟無物任飄江
 撫樽笑向兒童道安得佳肴錦鯉雙

表慶

此心外物不能降投綬歸休父母邦日展樹陰穠厭地
 雲縈嵐氣濕穿窻詩書有感人千古心跡無塵月一江
 杖履出門皆樂地白頭如我復誰雙

二

豪氣消磨壯氣降更無憂思到家邦地形蛇轉林邊路
 舍影魚驚水底窻工部扶衰歸杜曲賈生據憤弔湘江
 懷賢政爾心無那何處飛來白鳥雙

三

無奈詩魔未易降頓兵堅壁鵲華邦古今不捲江山畫
 日月常開宇宙窻我愛園公并角里誰誇陸海與潘江

寄聲農父須勤力已辦良田四十雙

錦里歸來萬慮降戴逵何必適他邦

晉戴逵爲避徵
君遠依王向

思弓劍驅千騎老愛琴書占一窓分芋帶烟寒斲玉尋

梅和月夜臨江漫郎誰是扁舟客政恐漁樵不敢雙

高岸深溝水自降爲田初不異爲邦鴉株影鬧斜陽屋

蠶葉聲乾莫雨窻夢覺春迷天上路文成神決筆頭江

幽關愛殺村居好日盡山行鶴與雙

亂山龍虎若余降誰道青山困一邦乏力病軀資淨几

讀書老眼借明牕樽中竹葉能忘世枕上楊花不渡江

自覺閑來文思進未應江下獨無雙

蝸爭蟻戰一麾降春滿東秦禮義邦皮裏陽秋寧用鑑

胸中樓閣底須臾吟節有興時行野博具無心盡墜江

爲謝百花潭上叟肯容分酌玉瓶雙

酒令詩籌衆所降虛名誰說可安邦一行鷺起滄浪水

半世蠅鑽故紙窓談塵坐招樵對榻茶甌笑與客分江

紅塵千丈人間世此樂人間信少雙

百戰功名孰肯降須知險地是危邦一時蠻觸憐南國

千古羨和羹北窓老柏倚風鳴地籟亂雲翻浪溢天江

詩因韻險還奇崛隻字真堪白壁雙

九十三

遂閑堂獨坐自和十首

鄉社優游素所甘烟霞元不責余貪山因野闊無藏碧
水為溪窮有斷藍佳景自當書一一元支機誰與論三三
歌謠聖代文田里莫道衰翁百不堪

露盤祀菊齒牙甘何必鹽梅鼎鼐貪五柳似人嚴戶牖
百花如綬亂緋藍世傳元立圃還舟九誰見黃眉洗髓三
我道雲莊即仙境杖藜游世名四時堪

自到家鄉水亦甘自尊鱸非是季鷹貪有生不喜窺權要

宋顏延之事無禍何慙衣縷藍數具河圖中衍五氣原太極

丙函三平生伎倆多曾慮只有調朱弄墨堪

擊鮮醜酒有餘甘種竹移花不是貪世事灰殘心上火

年光絲盡髮邊藍地環赤縣神州九中國外又如赤縣神州者九見史記

人共山猿野鶴三六載邱園凡六召小臣何德聖恩堪

世味寧同酒味甘野情不似宦情貪乘舟遠遁誰如范

拍版高歌每羨藍追狗僅能功第二卧龍竟使國分三

英雄事業無涯苦舉似高人一笑堪

至味何嘗有苦甘大觀初不校廉貪苦垣蝸篆斜行玉

此詩在江山天神為分甘一首之下

柳岸鶯梭巧識藍飲興半吞雲夢九吟魂高繞華峰三
青編黃髮林泉下此樂惟應我輩堪

涉世誰云病叟甘祝田嘗笑野人貪稻塍隣沼多蓮葉

柳岸圍村半蓼藍人馬郊行并影四宋沈慶之以公就

知為三公后賜三望車慶之曰我每游歷有人時我便

與馬成三無人時與馬成二安用此車遂不受所賜

風雷霆震任呼三後漢公沙穆隱居建威山中依林阻

書自若只應瀟洒雲莊景繪畫為圖想亦堪

嚼蠟功名幾許甘從今斥競斷癡貪雲山使我心如水

富貴令人面似藍盧杞幽處且同龜縮六讒言但恐虎

成三綠簑青箬真無價處處斜風細雨堪

江山天許為分甘莫訝雲莊老子貪對客不妨叅玉版

誨人政要勝冰藍管班許我時窺一鞶帶從渠日褫三

甚欲搜詩滿千首還愁花月不能堪

老來漱石枕流甘無意高牙大纛貪二子但教皆種德

諸生何苦為栽藍後漢楊震少孤貧養母假地種植謀

生鬼笑營十一得句鶴驚舞再三不是身閑衙詞翰挑

人風景每難堪宋劉伯顏歷位九卿郡守貧妻尤甚嘗

掌大笑伯顏嘆曰貧窮固有命乃復為鬼所笑也遂止

九

野興二首

出門游目景無窮老子惟愁詩不供流水紆青圖地勢
斜陽分綵繡山容代天理物類澆圃為世儲材自種松
莫視一閑為草草功名良苦且多凶

顏氏身窮道不窮一瓢何異八珍供天憐幽僻書門扁
梁沈瑀與范雲善齊末瑀就雲宿夢坐花為衰癯照病
屋上仰見天中有字曰范雲宅見本傳
容雲放月波搖岫幌風將仙樂入雲松此生已付林泉
了莫向著龜問吉凶

五

王內翰哀挽

元存無此首

束髮耽經晚益勤平生精力盡斯文前朝十老今餘幾
當代三王獨數君李賀屢煩韓愈駕羊曇空阻謝安墳
玉當寥索人何在落日溪窻滿白雲

書丰仙亭壁十首

達士應難折簡招未能數面但神交胸吞雲夢八九小氣壓
太行千仞高綠野有雲隨杖屨紅塵無路到枝巢山中宰相知
誰是老子如今不姓陶

同日午前校

歸田類稿卷十九

元張文忠公歸田類田藁卷二十

歷城 張養浩希孟氏 謨

同邑後學

周永年書長
毛堃戴之氏 校刊

五言絕句

詠荷花

水府羣仙會紅雲擁翠霞黃昏不歸去認得老夫家

遂闕堂

蕩漾灤湖月氤氳華鵲雲是中有佳趣未易與人云

綽然亭卽事二首

歸田類稿 卷二十一
茅亭雖若小左右皆春色風霜一戒嚴唯見松與栢水
逝月仍在山深雲不知松陰鶴立久似待老夫詩

四
郊飲醉歸

昨朝醉田間欲借山爲枕青山不肯前却枕白雲寢

五
過杭州伯顏丞相廟

取宋事不易歸朝客若愚誰知六經外元有聖人徒

七言絕句

六
堂邑宣化堂退食

縣齋公退炷爐熏聊爲塵煩一解紛開戶不教遠山去

簾紋浮動半窗雲

九
行水次郊外

雲馭疎陰漏日華
曉曉晨色散林鴉馬前怪底猶明月

路轉滿川蕎麥花

十
綽然亭口號

十年堅卧玉溪東
多謝山靈肯我容爲問賞心誰是伴
抱雲挂月兩奇峰

薄暮池亭獨倚筇
寒山遠火透林紅却愁今夕雲霄外
萬疊屏風一炬空

送客郊行二首

茅屋春融桑柘烟地偏雞犬靜柴關野人不解康衢頌
短笛一聲牛背山

牛羊散亂滿郊垌日莫吹烟草際生野老不須誇稿事

馬頭已自見昇平

大明湖泛舟

浮空汎影泝流光箕踞船頭倒羽觴喚出湘靈歌一曲
水雲搖蕩暮山蒼

題張古齋書室

鼎彝鹵鬲夏商前圖畫琴書晉宋間席促爐熏談至暮
落紅吹滿小重山

南口道中

巖壑秋高楓葉丹天風吹我畫圖間近來人說鑿輿過
數日香塵不見山

綽然亭十首

宦游華髮厭飄零一旦歸來萬慮冥莫道閒人無事業
翠紅栽滿綽然亭

一亭新構僅如蝸但遠塵埃便自佳底事東風不容物

掀簾吹落胆瓶花

自築層臺草棘間
興來時復一躋攀
不知老眼高多少
脚底雲生無數山

詩書堆案小窻明
花竹交加影半橫
燕子日長人睡起
一簾紅雨落無聲

山遶田園水繞庵
遨遊隨處儘吾堪
老來世事都無味
惟覺林泉蔗許甘

溪毛園甲儘芳生
野鶩河魚亦可羨
侑食不須絲與竹
只聽兒子讀書聲

窗影矐矐破曉寒
卧看紅日上簷端
雄鷄說與休多事
老子而今不屬官

虛名常恐汨吾天
一日能閑便是仙
賓客有無何足校
署門未覺翟公賢

世途覆轍日相隨
不待功成也合歸
直道遂心方說退
卻疑老子不知機

裴度休歸綠野堂
鑑湖曾識賀知章
老夫何敢前賢比
蒨屋荒村分退藏

十五 村居

萬山青繞綽然亭莫怪龐公嬾入城六月人間日如火
披襟松下聽泉聲

贈李祕監 至治間
畫御容

封章曾拜殿廷間凜凜丰儀肅九關回首橋山淚成血
逢君不忍問龍顏

拜東平王拜任丞相畫像

孤忠自倚了澄清笑視羣姦不足傾壯志未酬還中彼
披圖老淚雨如傾

夜坐綽然亭

夜深獨坐綽然亭林隙誰家燈火明鶴夢不驚人語定
空山一派亂泉聲

翠陰亭漫興十首

池荷香冷碧雲愁林樹陰疎翠幄收老子胡牀山影裏
擬尋詩句壓高秋

往歲歸心日夜馳而今何幸遂歸期回頭却憶從前事
真似邯鄲覺時

野人野處四三年雲擁柴關晝寂然時向東南一登眺
亂山龍虎欲來前

終日書堂足誦聲
斜陽猶放半窗明
硯乾旋滴花瓶水
春逐新詩筆下生

三十年前種此林
當時豈憶此投簪
而今嘯傲清陰底
未覺從前錯用心

綠瓊州渚紫金山
滿目風烟白鳥閒
莫道好詩無覓處
隱然多在夕陽間

山妻中饋椽藜羹
婢子兵厨取酒傾
更喜小兒能養志
琅琅不斷讀書聲

兩峯華鵠奠西東
老子幽居政在中
可是天公相愛甚
預爲陳設待衰翁

向來山在夢魂邊
今日山居掌握間
我卽是山山是我
君如不信問諸山

鉛槧圖書日與偕
空庭過雨滿莓苔
博山烟底趺坐
看得瓶花一半開

題李漑之池亭並頭白蓮

月光月華幾何年
一笑相逢寂寞邊
應爲湖亭風景好

並肩來看水中天

月光月華晉新淮二女皆有國色劉聰納爲左右嬪見晉書

山中

朝居日日憶山中擬欲題詩編玉峰今日好山俱在眼
卻愁詩思不能供

二十一
題李廣犯夜圖

犯法寧論故與新無私方可見爲臣竟將尉死將軍手
誰道當年國有人

二十二
題林泉閑居圖

向在紅塵羨彼閑而今我亦水雲邊只應此日紅塵客
却羨吾家小洞天

二十三
題田婦紡績圖

稼穡艱難近頗知豈惟田婦獨如斯披圖不用多題品
只寫幽風七月詩

二十四
題洛中諸公真率會圖

投老雲莊今八年我生常恨後諸賢一杯誰與同真率
江上漁樵海上仙

諸公事業照乾坤請老還家語語溫自愧無成年又末
也辭簪紱遯荒村

二十五
爲孔明解嘲

當年諸葛成何事只合終身作卧龍此前輩

之詩也竊謂孔明之心與三代之佐同非可
以出處論其高下故爲賦此以解其嘲云

孔明雖與漢爲臣尺寸無增只舊貧廊廟草廬初不異
誰言只合卧終身

二十七 過李漑之天心亭二首

久別天心水面亭風生吟袖喜重登謫仙將月游何處
揖徧雲山問不應

放眼乾坤獨倚欄古今如夢水雲間南山也解留連客
直送嵐光到坐閒

七 龍門

四野天門錦翠屏愛山直欲挾山行人生何必麒麟閣
大字龍門紀姓名

六 觀含元殿故址

當時宮觀上凌霄回首陵夷半野蒿愛煞堯階土三尺
至今猶與北辰高

二十八 詠史

至治元年余辭官歸鄉里日以文籍山水自
娛因觀秦漢至魏晉事若有感於中者遂爲

詠史詩四十六首以見意云

齊威王

君道從來本不難
令行惟在賞刑間
烹阿封墨須臾頃
便覺全齊重泰山

左師觸讐龍

水惟曲折海能通
指事直言未必功
嘗愛左師開趙后
雍容宮殿滿春風

龐涓

縱橫才畧一孫卿
底事將軍氣未平
只此便知優劣了

何勞樹下看輸贏

茅焦

積尸闕下欲成邱
殺氣纏雲尚未收
齊客膝行唯數語
誰知狼虎卻回頭

李斯趙高

秦室斯高兩巨奸
崎嶇心計各求安
闔門到了歸誅滅
本欲謾君卻自謾

呂后

婦人陰類狼淫俱
故德元勳半坐誅
鈞弋後來非命死

茂陵剛斷古今無惜高祖不誅此婦也

彭越

乘危襲亂起蓬蒿千古風雲有許遭天下已平猶戀寵
誅夷休恨卯金刀

周勃

兵子何堪總百官陳平狡獪故多端明知宰輔無難事
不肯傳人袖手看

武帝

內興土木外禽荒北伐東征事擾攘自已欲多渾忘盡
却評淖子不宜王

漢武公卿動滅夷殺心如此豈君宜他時巫蠱宮中禍
子喪孫亡實自貽

霍光

妻行弑逆子專權無乃將軍太黠然女不納宮兒罪死
也應慚愧柁侯賢

汲黯

大臣懼罪日驚慌強敵聞風亦退藏底事茂陵如此氣
不冠不敢見淮陽

公孫賀

明知漢武慘無恩相印悲持笈汝昏故使一身櫻恥辱
鼎砧未必到金門

蘇武

此首在王父後

為臣惟命敢辭難脫遇艱難亦自安試看子卿持節處
雪花如席不知寒

王父偃

鼎食渾能幾許甜先生不避柔願嫌他時舉族皆夷滅
此味方知極苦嚴

韋賢

一自留侯去决然再無高士為膠莛力辭台鼎歸田里
此日方知有此賢

丙吉

瑞氣天成五色文長安獄邸閉皇孫護持高廟神靈在
相國應宜十省恩

蕭望之

自省無愆任眾排便歸廷尉亦何哀當時恨殺朱雲鰲
早是剛腸勸我裁

京房

盈虛消息理精微易學從來貴見幾箇裏情然無所見
區區占候是耶非

楊惲

相臣得罪息交游私室兢兢若自囚歌酒放懷非汝事
本期行樂却成憂

王章

浮雲蔽日黯無輝此際翻然便合歸說似獄中京兆尹
牛衣未必下朝衣

谷永

倚中有救恣開陳縷數危亡在莫辰去旆不過交道廐
至京寃血漬京塵

息夫躬

正進猶難免罪尤況行不法望公侯區區狡計知何益
贏得千年臭不休

彭宣

百詐干邪安漢公忠良那肯與相從勇投印綬超然去
不信孔光無媿容

梅福

忠言無路徹宸聰
詭服深藏吳市中
只道世間無白雉
豈知天外有冥鴻

龔勝

解印歸來老分甘
素衣不受一塵沾
忽驚有詔從天下
頓覺衰靡十倍添

劉歆

拍塞胸中書五車
卻能委曲事奸邪
當時似此知多少
豈止先生可歎嗟

王莽

桃李元無松柏心
鴟梟強作鳳凰音
當時一切皆從古

底事阿衡用意深

王皓王嘉

二隱士公孫述累徵不起遂賜死

隱無真識保終難
勢迫誰能不改顏
愛殺蜀中兩夫子
甘心伏劍死空山

韓歆

以直言自殺

直言爲國舉朝無
幸有緣何却見誅
文叔襟懷乃如此
誰言高祖與同符

馬援

丈夫奇節在邊庭不願黃腸送此生底事五溪烟瘴底
鄉居却羨少游榮

劉昆

矯情干譽世紛然才有微功即自傳滅火反風言偶爾
此心安得不廻天

桓榮

諸生爲學務明倫受印印綬何須廣坐陳以此便爲稽古力
阿榮胸次太埃塵

黃憲

風旨言談了不聞諸君降伏每疑人乃知道義熏烝處
形迹俱無物自春

楊震

事安帝

喜君清白羨君忠既去宜平碗礪胸半路慨然甘自醜
先生舒卷欠雍容

李固杜喬

危邦何可一朝居二子雖忠識亦踈地下若逢楊太尉
不須更問國何如

小人方寸足机阮君子從來直道行二者早知難並立
不如田里樂如生

魏桓

累徵不起或勸其行桓曰后宮可損乎左右權倖可去乎云云

將進先思已所行所行不遂有何榮直教遇難方知止
却笑渠儂理未明

朱霞

陳蕃友也蕃誅為匿其子事覺考掠終不肯言

交道衰微數百年死亡誰肯與周全如何當日陳蕃榻
止為南州孺子懸

范滂

在朱雲前

時危政要似愚癡出位譏評恐未宜可惜許多忠義士
纍然俱與禍相隨

陳容

在表紹坐見賊洪甘與同死紹亦殺之

不期表紹共生全甘與賊洪赴九泉每誦此言千載下
令人毛髮尚森然

禰衡

才如利器要深藏揮霍於人何可當自古殺身多坐此
聖賢固不貴詞章

袁閔

為黨人潛土室中十八年

志士從來多苦心
逃名不厭土房深
弟兄妻子皆無見
時有白頭老母臨

龐德公

鹿門佳處恣遊遨
誰識沉冥一世豪
莫把功名論出處
卧龍終讓德公高

司馬懿

魏移漢祚未須與
三馬槽中已夢符
天道好還良可畏
不如爲善百無虞

蔡邕

殿廷白晝隨青蜺
乾道無剛政可知
顧此何時陳正論
有才無識亦堪悲

歸田類稿卷二十

四月二十三日校於米市兒宅

元張文忠公集附錄

張養浩字希孟濟南人幼有行義嘗出遇人有遺楮幣于途者其人已去追而還之年方十歲讀書不輟父母憂其過勤而止之養浩晝則默誦夜則閉戶張燈竊讀山東按察使焦遂聞之薦爲東平學正游京師獻書于平章不忽木大奇之辟爲禮部令史仍薦入御史臺一日病不忽木親至其家問疾四顧壁立歎曰此正臺掾也及爲丞相掾選授堂邑縣尹人言官舍不利居無免者竟居之首毀淫祠三十餘所罷舊盜之朔望叅者曰

徒皆良民饑寒所迫不得已而爲盜耳旣加之以刑猶以盜目之是絕其自新之路也衆盜感泣互相戒曰毋負張公有李虎者嘗殺人其黨暴戾爲害民不堪命舊尹莫敢詰問養浩至盡寘諸法民甚快之去官十年猶爲立碑頌德仁宗在東宮召爲司經未至改文學拜監察御史初議立尙書省養浩言其不便旣立又言變法亂政將禍天下臺臣抑而不聞乃揚言曰昔桑哥用事臺臣不言後幾不免今御史旣言又不以聞臺將安用時武宗將親祀南郊不豫遣大臣代祀風忽大起人多凍死養浩于祀所揚言曰代祀非人故天示之變大違時相意時省臣奏用臺臣養浩嘆曰尉專捕盜縱不稱職使盜自選可乎遂疏時政萬餘言一曰賞賜太多二曰刑禁太疎三曰名爵太輕四曰臺綱太弱五曰土木太盛六曰號令太浮七曰倖門太多八曰風俗太靡九曰異端太橫十曰取相之術太寬言皆切直當國者不能容遂除翰林待制復搆以罪罷之戒省臺勿復用養浩恐及禍乃變姓名遁去尙書省罷始召爲右司都事在堂邑時其縣蓬魯花赤嘗與之有隙時方求選養浩

爲白宰相授以美職遷翰林直學士改秘書少監延祐初設進士科遂以禮部侍郎知貢舉進士詣謁皆不納但使人戒之曰諸君子但思報効奚勞謝爲擢陝西行臺治書侍御史改右司郎中拜禮部尙書英宗卽位命叅議中書省事會元父帝欲於內庭張燈爲鰲山卽上疏于左丞相拜住拜住袖其疏入諫其畧曰世祖臨御三十餘年每值元夕閭閻之間燈火亦禁況闕庭之嚴宮掖之邃尤當戒慎今燈山之構臣以爲所翫者小所繫者大所樂者淺所患者深伏願以崇儉慮遠爲法以

喜奢樂近爲戒帝大怒既覽而喜曰非張希孟不敢言卽罷之仍賜尙服金織幣一帛一以旌其直後以父老棄官歸養召爲吏部尙書不拜丁父憂未終喪復以吏部尙書召力辭不起泰定元年以太子詹事丞兼經筵說書召又辭改淮東廉訪使進翰林學士皆不赴天歷二年關中大旱饑民相食特拜陝西行臺中丞既聞命卽散其家之所有與鄉里貧乏者登車就道遇餓者則賑之死者則葬之道經華山禱雨于嶽祠泣拜不能起天忽陰翳一雨二日及到官復禱于社壇大雨如注水

三尺乃止禾黍自生秦人大喜時斗米直十三緡民持鈔出糶稍昏卽不用詣庫換易則豪猾黨蔽易十與五累日不可得民大困乃檢庫中未毀昏鈔文可驗者得一千八十五萬五千餘緡悉以印記其背又刻十貫伍貫爲券給散貧乏命米商視印記出糶詣庫驗數以易之於是吏弊不敢行又率富民出粟因上章請行納粟補官之令聞民間有殺子以奉母者爲之大慟出私錢以濟之到官四月未嘗家居止宿公署夜則禱于天晝則出賑饑民終日無少息每一念至卽撫膺痛哭送得疾不起卒年六十關中之人哀之如失父母至治二年贈攄城宣惠功臣榮祿大夫陝西等處行中書省平章政事柱國追封濱國公諡文忠二子彊引彊先卒元史本傳按引官職不見于史而貢師泰等敘三事忠告謂引字惟遠至正十五年來僉閩憲克濟世德今七聘堂內所刻養浩手書詩詞在十四年引皆有跋署云朝議大夫陝西諸道行御史臺監察御史知其歷官先秦而後閩也胡德琳歷城縣新志蘇天爵七聘堂記士君子之出處有義存焉審其時而

後動合乎禮而後應是以

缺二字

而不行者非敢故爲亢

也蓋本諸道義之正循乎禮節之宜自昔君子進退出處之際莫不皆然愚于故贈平章政事張文忠公深有慕焉公起諸生致位至中執法其牧民則爲賢令尹入館閣則曰名流司臺諫則稱骨鯁歷省曹則號能臣是誠一代之偉人與至治初公中書蔡預以親老謝政而歸屏居田里凡踰八年朝廷重其名德七遣使者聘之而不果起及聞西土凶荒一命卽起罄思竭力出帑發粟全活生靈不知紀極斯其胸中所蘊豈尋常者能窺

其萬一哉方公之西行時適作新堂于濟南澄清里第門生今翰林承旨張公名之曰七聘之堂蓋以著公之節也至正五年天爵來爲憲使公子大廟署令引求記其堂昔先子與公同朝雅厚故不敢辭嘗聞君子立身莫重于保守名節大臣爲政莫急于康濟斯民伊尹耕于有莘之野湯三使往聘之旣而幡然改曰予天民之先覺者也予將以斯道覺斯民也思天下之民匹夫匹婦有不被堯舜之澤者若已推而內之溝中富鄭公安撫京東會河朔大水民多流亡勸民出粟十五萬斛益

以官廩隨所在貯之得公廬私舍十餘萬區散處其人
以便薪水於是活流民五十餘萬是古之聖賢其出而
用于世者皆所以爲天下也然則公之去就度亦合乎
古人之道乎夫以公之文章傳海內德業具國史斯不
待贊而彰也特發其出處大節以爲世之師表焉士之
登公斯堂思其難進易退之風審其度時合義之制則
立人之朝必無貪位苟祿之恥矣是歲冬十月癸酉趙
郡蘇天爵記據碑

人海記崇文門東南有淨髮寺按元張中丞養浩作其

子雁奴壙銘有二云權厝文明門外淨髮寺之南原寺蓋

元時有之矣

按髮一作度

右見朱彝尊曰下舊聞

擬雅古詩二篇晨興五言今律一篇先文忠公所遺翰
墨也引恐其久或摩滅命工摩勒如上嗚乎先公遂閑
之情取友之誼于此度見其一端矣至正十四年甲午
春三月良日朝請大夫陝西諸道行御史臺監察御史

嗣男引百拜謹識

石刻

雲莊在府城西北

陸鉞山東通志

雲莊張養浩致政中時所居中有雲錦池雪香林挂月
峯待鳳石遂間堂處士菴綽然拙逸樂全九臯半仙五
亭有記又有翠陰亭至今子孫猶能世其業葉奕繩

縣舊志

按殷文莊祭公墓文有云憶馴鶴之閒適子揖石友之
巖從舊志云公置竒石十每飲呼為十友秋史濟南先
正咏云丞相祠堂翠欲流雲莊十友散荒邱只餘一賦
千金值零落齊州白雪樓十友即十石也白雪樓原注
云文忠造白雪樓賦載歸田集中或白雪樓之訛也今

歸田集不可見姑存之以俟考

州城縣新志

張養浩墓城西北一十里雲莊

陸通志

始公嘗謂吾居雲莊而樂且密邇吾先世大墓吾死必
以昭穆序葬而於是乎祠焉九月丙辰公嗣子今秘書
郎引遵治命奉柩以葬而以清河郡夫人郭氏附

黃潛張公

祠記

章邱縣東南十五里有養浩墓今按元史養浩其先章
邱人後徙濟南今府城之西十里雲莊即其所居生既
家于濟南隱于雲莊則其墓在此無疑矣有學士張起

巖神道碑

陸通志

按養浩有自撰先塋碑在章邱東南相公莊張萬墓旁
詳其文義及立碑年月萬乃養浩伯祖葬章邱自養浩
之祖已居葬于歷城矣故曰密邇吾先世大墓也此碑
乃養浩所撰歷城一支之墓碑明正德中其裔孫某摩
刻立于章邱者後人不察遂謂養浩墓亦在章邱誤矣

歷城縣

新志

維宏治六年歲次癸丑二月丙申朔越二十六日辛酉
致仕吏部尙書尹旻等謹以清酌之奠致祭於元濱園

公張先生之墓嗚呼濟南自古雖多名士獨我先生善
養浩氣充之建功業有益於當時發而為文章可傳於
後世五旬便退優游歷下之林泉七聘方興拯恤關中
之黎庶凜凜清風綽綽高致節全始終名留天地齊魯
一人今昔罕儷旻等後生小子景仰光霽蓋嘗服膺先
生三事忠告頗知入仕之方歌詠先生雲莊樂辭深得
田園之趣今也端拜泉臺敬陳薄祭冥冥有知鑒此微
意況今小民艱食和氣乖戾伏望先生在天之靈斡旋
化機早降甘樹庶不負血食於一方我民永賴而不替

也嗚呼尙饗石刻

陳鳳梧張文忠墓詩流泉千古說雲莊一束生芻拜墓
旁雲錦池邊春意動雪香林外午陰涼衣冠遺澤孫曾
在俎豆名祠歲月長仰止綽然亭畔路文章事業正流

芳雲莊樂府附錄

虞集題張希孟疑雲石詩 海石不盈握隕然如委雲

危岑集遠思虛竇棲微燠天高大華斷日出香爐分几

研襲清潤文章互網蘊潛雷起神谷震驚天上聞亟視

恐無及化為九龍文四朝詩選

虞集題張養浩詩碑

早從中州遊希孟實豪傑窮窟如喬岳培塿謝駢駢侃

侃買燈疏英主動顏色賢子翳黃壤感嘆解朝玦朝遊

長白雲暮踏鶴亭月慨然將終身屢召不踐轍兵餘關

中饑特起拯焚烈掩袂傷道窮委頓成隕絕賦詩哭遺

直好事為鐫碣爾來二十年江海鬢如雪每與故人思

遠道嘆睽越忽逢諭先生清江倚舟揖久為濟南客山

川類能說其言中丞舊流水助嗚咽更出中丞書歲久

字不滅交誼貴久要於焉見高節問其將何之簪笏在

周列觀人以其主論薦共持挈敢為祿仕勸聊以誦明

哲古人不可欺長風起天末石刻

雲莊傳家集三冊見文淵閣書目文忠集十八卷見國史經籍志

文忠集十八卷見焦竑國史經籍志

御史箴見歷城縣舊志

雲莊樂府一卷據木書

艾俊序畧曰文忠歸隱雲莊凡接于目而得于心者製

小令六十三首題曰雲莊休居自適小樂府歌之使人

名利之心都盡歷下風有梓本日久漫滅今重鐫以廣

其傳俾後世頌公之詞想公之志同上

雲莊四六餘話見某氏書目

亭木曾拙序公集云云今觀其句法如江空孤月白天

澗片雲高月色蟲邊苦秋容雁外深斷嶺雲通氣顛崖

樹倒根又鶴嫌客俗穿雲去燕喜春陰掠地飛華髮半

簪天與老丹楓兩岸水分秋半窗春夢子規月滿院客

愁楊柳花勘破宦途盤谷序蹴開天網漆園書其風致

瀟灑在元和長慶間也顧嗣立元詩選

十三

序菊

余於諸花中獨愛菊非矯情襲陶之高之潔而然也夫菊之種甚繁花若色亦不一葉雖荏蕪相肖然隨其花而為狀亦不同味則似苦而甘餌之可以輕體延年者無分黃白紅紫朱則一也大抵黃為菊之正色然黃之中又有所不一有淡者焉有濃者焉有先黃後白者焉有黃白相錯者焉其他或紅或白或紫或朱者亦如之比聞京師傳有黑者由未之覩茲故不錄夫色之不一他花亦或有然者若乃花之不一吾惟菊之見焉且五

行之氣播為萬物其精英之餘為異葩奇丹并陰陽一噓而滋榮陰陽一吸而掣斂而菊也獨能於掣斂之時揚芳吐季秀又能狀他花而兼之此其所以為尤奇也歟夫牡丹花中極品也然其花止如其名菊則有桃花若者有薔薇若者有垂絲海棠若者有齒菖芙蓉若者有枇杷荔支牡丹若者有木香荼蘼棣棠若者凡若彼者亦不一至其生也雖有踈密脩短大小肥瘠之不同大槩皆業叢而不樹最余平昔所見率不越二三尺蕭穎士謂既低其枝又弱其幹者其為叢蓋自古然也其強之以為樹者纔近年見之嘗聞園丁言菊一叢可折數十本一本則拊其橫枝掇其傍蕾惟餘數萼若然則花之敷也廣徑可三寸許其孤高可以丈餘由無庶藥以竊其氣故也余聞哂而詰曰審如是則焦僂去其手亦可使如古防風氏乎園丁亦哂而不荅後余宦京師於宗人張儀之家見盆植六七尺強者其名勝金黃驚詢之語如園丁旨其家又云此猶非高者苟功於摘剔工於矯揉勤於膏沃專於護持有踰尋丈者余雖懲前詰之誤然質諸古人之辭參以平日所見其心終不深信及致

政家居於張智甫家見丈五有奇者花殘紅名醉揚妃
余謂菊為高人勝士重者以耿介特立不與凡卉伍也
庸可以亡國屢藥目之因易曰傲霜春主人甚偉余言
繼而於姻親吳彥清家見彷彿二丈者名御愛黃二花
皆植陶器中高矣然其花止五六且居其顛余又哂曰
使淵明觀之則必翹首引領踵為之虛而背為之仰矣
雖欲采落英以杯之恐不可得聞者皆為粲然因思草
木非有古今之別也然昔者殺而今焉隆昔者叢而今
焉樹者何也蓋群彙圃圃生大化之中氣并隆隆而物亦隨
之理勢然也况古人厚而今人薄古人約而今人汰古
人朴而今人機且巧為彼物者惡得不與之摩耶嗚呼
嘗聞申包胥人能勝天之言為太過今以是花觀之則
申公之言為有徵矣雖然夫菊鍾秋肅殺之氣以生蓋
其性本貞切嘗引之以况壽者惟貞也故密可使之疏
焉短可使之脩焉小可使之大焉瘠可使之肥焉若乃
霜之風之不為變易摧落者此則人所不能為也蓋人
所能者末也其所不能者本也本於天者貞而人從而
脩之則其益茂益長也又奚訝余於是得養生焉故叙

之以示與吾同好者

六十六 休日郊外

久厭官居苦幽尋到澗阿鶴知松歲月鷗狎海風波野
迥塔孤立嶺高雲半過菟裘良未暇聊此慰蹉跎

六十七 立秋後五日夜坐有感

老火戢餘烈清商迴舊音一涼天地德 茅心月
色虫邊苦秋容鴈外深呼兒理 燭擬從今

六十八 過友人村居

信屨荒寒外風煙喜遠迎過橋驚鷺散 人行謀
野詩多健看山眼倍明嗟余本 日典同盟

六十六 辭參議還家

世味醜於酒着人多醉酣還君霖雨策復
歐員三宜去嵇陳七不堪從今措老
意看煙嵐

六十七 探春

春洽花猶未雲凝雨尚難政餘仍杖屨路
野色水分破夕陽鴉叫殘小橋人
挽過林端

六十八 寒食客舍

四序誰移代群芳自白紅淹回憐客子走
軒冕形骸外田園夢寐中一杯先隴
擬百川東

六十九 齋居春暮

誦罷窺園圃俄驚春事空狂風花敗北浮
山益詩人課巢誇燕子功眼前皆道
與八吟翁

七十二 遊華鵲村別墅

蟬蛻塵埃外鴻冥水石間老無囊底智閑
簫鼓村村社丹青步步山三年方得
氣動林巒

六二十一 題主簿棄官侍親詩卷

我以官為養君因養棄官雲泥雖許異菽水幸
戲綵兒群舞稱觴母萬安人生忠與孝莫
作兩途看

六十二 湖亭小酌

浩七日中市熙熙湖上春竹能醫俗士□□□□
閑人得意紅螺淺忘機白鳥馴勝遊休□□□
盜跖總埃塵

二十四

堂邑祈雨文

維某年某月某日承務郎堂邑縣尹兼本縣諸軍奧魯
勸農事張某謹以清酌庶羞之奠敬祭于某神之靈某
祇受

天子命出尹于此未及其境夙夜以思幼而讀書長得
百里之地而治之是惟無為；則何政不可行何得不
可積何人不可澤上不負國中不負親下不負所學奉
職以來即潔躬齋居屏遠穀色心欲與古人滅火反風
蝗不入境政如神明者並驅爭先此其素心而天地鬼

神所照臨者也未及數月值早暵不雨民頗為憂竊自謂以某之心膏澤之降必在旦暮今既旬浹而亢陽如故將以惠民而神不隨將以報國而神不與抑不知某何以得罪於神而斬焉無所感格如是耶且厥今之制昭昭者責之於吏冥冥者託之於神所以詔書每下自古聖帝明王忠臣烈士名山大川凡血食於郡國者未嘗不懇々及之非徒美觀聽為虛文蓋以贊治道福民生成歲事寔有望於爾神也神不見答豈惟負國抑亦負民豈惟負民仰亦負某此來為國為民之心使縣尹貪庸鄙狎神之不見亮也固宜苟為不爾神必有以處之矣尚饗

二
謝雨文

年月日具官某謹以清酌庶羞之奠敬謝于某神之靈某性識愚暗溺於古而不通於今孚於民而不信於神向以旱故輒以狂直之文有禱于祠下將謂神必見怒荐降以灾不意奠拜之明日甫交三鼓陰雲四合自昧爽至午後不風不雷既沾既渥闔縣耆老皆歸功其尹夫尹恃神以濟其不及者也其敢貪厥成功以自重其

曠職之罪玆謹躬詣拜嘉伏惟尚饗

二十四

綽然亭上梁文

常慕閑而未遂久奉清泉白石之思不待年而遽歸已
冥皂蓋朱幡之慮必功成而始去恐時失而莫追聞健
休官用期寡過伏念某夙非閎闊雅鬱經綸玄裳豈願
乎乘軒馘尾本期於縱疑偶操刀於外邑俄持斧於中
臺抗言幾血於虎牙珥筆復塵於螭首在棘闈而兩叨
貢舉入蘭省而三預贊襄簿書身憊於奔馳期會耳煩
於呼叱五更待漏遙瞻鬼魄於璇霄一疏論燈誤得驪

珠於滄海衆皆過譽其忠蓋已獨自悔其狂愚雖蒙鉄
鉞之寬實出神明之祐幸今完璧理合迴輶王夷甫宦
情之無哂清談之多嚮錢若水急流而退嘆竒節之鮮
儔非有心敢擬乎名賢固無技可呈於治世疇昔之捧
檄非誑而今之稅駕何疑人謂歐陽公踐言之遲我喜
陶弘景掛冠之早爰於別墅肇構斯亭適當華鵲之衝
兼有泉石之勝芳叢錯繡繞風煙移榻而觀老瓦傾銀
掬水月洗觴而飲於心足矣何福如焉昌晚景於桑榆
傲歲於松栢一蓑煙雨絕無庾亮之塵四面雲山盡是

王維之筆或天游於汗漫或雲臥於荒寒或散以弄扁
舟或披襟而坐茂樹或投轄以留飲或臨池以學書或
倚節而聽猿啼或投芥以命宦舞或弦誦以教子或吐
納以學仙或酣歌賓客之前或長嘯煙霞之表惟日不
足其樂無涯一壺一丘聊以償半生之苦五十五詔將
何報

九重之知仰架修梁俯陳善禱

東繞屋烟嵐萬玉峯莫道歸來無用處也能善頌效

華封

南林影山光水倒涵一自角巾還第後懶將心事向
人談

西竹塢蓮塘接稻畦榮辱從今都識破不須鵬鷃校
高低

北郊原處處皆春色牧童也識太平惟落日一殺牛
背笛

上朝暮雲烟千萬狀紅塵不到笑談邊何處人間有
蓬閣

下世累而今都不挂閑來底事用吾心看水看山仍

看稼

伏願上梁之後神人胥悅物我皆春書添架上之芸香
酒溢床頭之松乳佳客常盈於座榻好山永對乎軒楹
居畎畝而遺安竊比襄陽之隱士處巖穴而索價不為
少室之山人

二十四 西華嶽廟祈雨文

維天曆二年三月戊午朔越廿有九日乙酉陝西諸道
行御史丞張某謹以清酌庶羞之奠敢昭告于

金天大利順聖帝之靈某幼讀古人書欽聞明神獨尊

西土歷代祈禱靈應赫然則神之得名於世者舊矣不
虞衰暮茲因游宦始獲仰止下風然不幸屬民多艱流
亾強半餓而死者相枕于途今將首夏尚爾亢旱如故
某雖叨榮行臺實悲竇懼使某平昔素無為國為民之
心重以貪殘邪僻神不見恤則固其宜萬一少有取則
神亦安能漠然坐視不為動於中也伏望垂鑒愚忱少
沛甘澍使民回生意歲秋有期則神之血食古今者為
不誣矣倘不見與則某惟有省愆待罪日拜神前必待
示其不見答之由然後退

是日陰晦不雨五
更再以文禱之

西華嶽廟催雨文

維天曆二年三月戊午朔越三十日丁亥西臺御史中丞張某昨以歲旱民凶比屋病疫謹齋沐於二十九日早哀祈雨澤于

金天帝君之前黎明雲氣四集川嶽之形皆為冥晦私切甚喜以為明神見憐甘霖之來可跂而待不圖為風所梗旋致舛然伏念某為西臺之官帝為西土之神今歲屯如是民隱如是臣雖未上胡寧彼忘不神之禱尚誰禱哉况神令一出闔境之內何靈不隨非勢窮事迫臣亦何敢不知忌諱連日荐瀆惟神有以哀其愚而終惠之則某雖旅困于途敢不重報尚饗

為民病疫告斗文

維天曆二年六月某日資善大夫陝西諸道行御史臺御史中丞張某等謹以清酌庶羞之奠敢昭告于北極玄武之神惟斟酌元氣標準准衆星運行四時贊成天道凡沴疫不正之氣上千陰陽之和者屏而去之是固其職今三輔之民自春徂夏由病疫而死者殆數萬計巷哭里哀月無虛日使彼有罪已盈其罰伏望明神

自今咸加寬宥社其禍源開以生路滌之以甘雨蕩之
以祥飈使人蒙休嘉物遂生息某等雖備員西臺亦或
少紓厥責凡此者無非神之惠也尚饗

二十四

潘仲德畫像贊

士不患無文而患乎無氣行不病過方而病乎過圓嗚
呼如吾德其氣軒然其守確然吐而為文浩乎若不可
禦之川家徒四壁而官止乎七品人見夫昂藏之狀於
外真不啻擅猗頓之富而操趙孟之權其清斯冰其直
斯弦高峻夷乎崧嶽金石等其剛堅方斯文之有望竟
以狷介而致不年此吾所以因其像表其心使夫阿匿
媚世悻悻為唯利之見者矐後塵而不敢萬分一擬其
賢也

二十四

寫真自贊

為隱耶容貌不類乎山澤為仕耶心志常存乎丘壑雖
揚歷三十年而未嘗有一毫之利於家及其退而徜徉
於深山之中亦猶前日之臺閣出五旬而求閑近乎勇
凡七徵而不起類乎弱嗚呼如斯人者其殆知止知足
以道自樂全己之天而無慕於世之名爵者耶

補鈔各首均照元刻本校過 壬戌十月十三日沅牋記

[Faint bleed-through text from the reverse side of the page]

